



Kisah Para Solihin

MOHD FAREZUAN BIN MAT AZAHAR

Pendahuluan

Segala puji bagi Allah Tuhan sekalian alam, selawat dan salam ke atas junjungan besar Nabi Muhammad ﷺ, ahli keluarga Baginda dan para sahabat seluruhnya.

Kitab kecil yang diberi judul 30 Kisah Solihin ini disusun dengan tujuan menghimpunkan kisah-kisah pilihan daripada kehidupan orang-orang soleh, ulama dan hamba Allah yang bertakwa. Setiap kisah bukan sekadar untuk dibaca, tetapi lebih utama untuk direnungi dan dihayati agar daripadanya lahir ibrah, pedoman dan teladan dalam membentuk hati yang tunduk kepada Allah.

Sesungguhnya perjalanan hidup para solihin penuh dengan ujian, kesabaran, keikhlasan dan ketaatan yang menjadi contoh sepanjang zaman. Dengan mengambil pengajaran daripada mereka, diharapkan kita mampu memperbaiki diri, mendekatkan hati kepada Allah, dan menempuh jalan menuju ketaqwaan, sebagaimana firman Allah Ta'ala:

وَتَزَوَّدُوا فَإِنَّ خَيْرَ الزَّادِ التَّقْوَى

“Berbekallah kamu, maka sesungguhnya sebaik-baik bekalan itu adalah taqwa.” (Surah al-Baqarah: 197)

Mudah-mudahan Allah menjadikan usaha kecil ini bermanfaat, menyuburkan iman di hati para pembaca, dan menjadi sebab untuk kita semua tergolong dalam kalangan hamba-hamba-Nya yang bertakwa.



Isi Kandungan

SAIDINA ABU BAKAR AS SIDDIQ	04
SAIDINA SAAD BIN ABI WAQQAS	06
SAIDINA BILAL BIN RABAH	08
SAIDINA ABDULLAH BIN MAS'UD	10
SAIDINA SUHAIB AR-RUMI	12
SAIDINA ABU ZAR AL-GHIFARI	14
SAIDINA ABDUR RAHMAN BIN AUF	16
SAIDINA ABU HURAIRAH	18
SAIDINA KHALID BIN AL-WALID	20
SAIDINA ABDULLAH BIN ABBAS	21
SAIDINA UKASYAH BIN MIHSHAN	23
'UMAR BIN 'ABD AL-'AZIZ	24
AL-IMAM ABU HANIFAH	26
AL-AHMAD BIN HAMBAL	28
AN-NAJASYI	30
TIGA ORANG YANG TERPERANGKAP DI DALAM GUA	33
KISAH DUA ORANG RAJA YANG BERTAUBAT	35
KISAH JURAIJ SEORANG LELAKI BANI ISRAEL	37
KISAH LELAKI PEMILIK SERIBU DINAR	39
KISAH QADHI & ZULQARNAIN	41
SAIDATINA KHADIJAH BINTI KHUWAILID	43
ISTERI NABI AYYUB	45
UMMU SULAIM	47
SAIDATINA ZAINAB BINTI JAHS	49
SAIDATINA SAFIYYAH BINTI 'ABDUL AL-MUTTALIB	51
UMMU AIMAN	52
WANITA SOLEHAH	53
SAIDINA JARIR BIN ABDULLAH	54
BAQI BIN MAKHLAD AL-QURTUBI	55
AL-IMAM ABU HATIM MUHAMMAD BIN IDRIS AL-RAZI	56



Saidina Abu Bakar

As-Siddiq

Saidina Abu Bakar merupakan antara orang terkemuka Quraisy, seorang bangsawan mereka dan salah seorang pemimpin Quraisy. Beliau seorang ahli perniagaan dan sangat disayangi masyarakat kerana ilmunya serta akhlakanya yang mulia dalam bergaul. Beliau tidak pernah minum arak dan tidak pernah sujud kepada berhala. Maka beliau adalah termasuk golongan manusia terbaik pada zaman jahiliah dan juga setelah datangnya Islam. Beliau memeluk Islam tanpa ragu-ragu dan merupakan lelaki dewasa yang pertama memeluk Islam daripada golongan merdeka. Beliau telah berbaiah dengan Nabi untuk membantu baginda dengan segala apa yang dimilikinya. Nabi SAW pernah bersabda tentang beliau:

أرحم أمتي بأمتي أبو بكر

“Orang yang paling belas kasihan terhadap umatku ialah Abu Bakar.”

Beliau menanggung beban dakwah bersama Nabi SAW, lalu berkat usaha beliau, ramailah orang-orang utama dalam kalangan manusia terbaik memeluk Islam melalui tangannya. Ketika kaum kafir Quraisy berkumpul untuk menyerang Nabi di Kaabah, Abu Bakar datang dan menghalang mereka daripada mengganggu Nabi. Beliau berkata kepada mereka:

أَتَقْتُلُونَ ضَوْءَ اللَّهِ رَجُلًا أَنْ يَقُولَ : «رَبِّيَ اللَّهُ. فَأَقْبِلُوا عَلَيْهِ وَأَوْسَعُوهُ ضَرْبًا»

“Adakah kamu mahu membunuh seorang lelaki hanya kerana dia berkata: Rabb-ku adalah Allah?” Maka mereka pun menyerbu beliau dan memukulnya dengan sangat teruk.

Beliau kemudian berhijrah bersama Nabi, satu penghormatan dan kelebihan yang tidak dicapai oleh orang lain kerana hanya Saidina Abu Bakar menjadi peneman bagi Rasulullah dalam hijrah ke Madinah. Ketika Nabi SAW jatuh sakit, baginda bersabda dalam khutbah terakhirnya: “Sesungguhnya orang yang paling banyak jasanya kepadaku dalam persahabatan dan hartanya ialah Abu Bakar. Jika aku dibenarkan mengambil seseorang sebagai khalil selain Tuhanku, pasti aku akan mengambil Abu Bakar, tetapi cukuplah persaudaraan Islam dan kasih sayangnya. Jangan ada pintu yang tinggal terbuka di masjid melainkan hendaklah ditutup, kecuali pintu Abu Bakar.” Apabila Nabi sudah tidak mampu keluar untuk solat bersama orang ramai, baginda memerintahkan supaya Abu Bakar yang menjadi imam menggantikan baginda.



Ketika kewafatan Rasulullah, para sahabat menjadi terkejut dan lemah ketika menerima berita kewafatan Rasulullah, kecuali Abu Bakar. Maka beliau pun mengucapkan kata-katanya yang masyhur:

أَيُّهَا النَّاسُ مَنْ كَانَ يَعْبُدُ مُحَمَّدًا فَإِنَّ مُحَمَّدًا قَدِمَاتٍ وَمَنْ كَانَ يَعْبُدُ اللَّهَ فَإِنَّ اللَّهَ حَيٌّ لَا يَمُوتُ .
وَقَرَأَ : وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ أَفَإِنْ مَاتَ أَوْ قُتِلَ انْقَلَبْتُمْ عَلَى أَعْقَابِكُمْ وَمَنْ يَنْقَلِبْ عَلَى عَقْبَيْهِ
فَلَنْ يَضُرَّ اللَّهَ شَيْئًا وَسَيَجْزِي اللَّهُ الشَّاكِرِينَ

“Wahai manusia, sesiapa yang menyembah Muhammad, maka sesungguhnya Muhammad telah wafat. Dan sesiapa yang menyembah Allah, maka sesungguhnya Allah itu hidup dan tidak akan mati.” Lalu beliau membaca ayat:

“Dan Muhammad itu hanyalah seorang Rasul, sesungguhnya telah berlalu sebelumnya beberapa orang rasul. Apakah jika dia wafat atau terbunuh kamu akan berpaling ke belakang (murtad)? Barang siapa berpaling ke belakang maka dia tidak akan memberi mudarat kepada Allah sedikit pun, dan Allah akan memberikan balasan kepada orang-orang yang bersyukur.”

Apabila beliau diangkat menjadi khalifah, beliau merupakan sebaik-baik pengganti Rasulullah SAW. Dan ketika beliau sakit tenat menjelang kematiannya, beliau memerintahkan supaya semua harta yang bertambah sejak beliau menjadi khalifah dikembalikan ke Baitul Mal, sebagai tanda wara' dan amanahnya. Lalu Umar pun menangis sambil berkata: “Semoga Allah merahmati Abu Bakar. Sesungguhnya beliau telah menyusahkan orang yang datang selepasnya dengan kesusahan yang begitu berat.”

① Maksud kata Saidina Umar : "Semoga Allah merahmati Abu Bakar. Sungguh beliau telah menyusahkan (memberatkan) pemimpin selepasnya dengan mencontohi akhlak dan amanah yang terlalu tinggi."



Saidina Saad Bin Abi Waqqas

Beliau adalah salah seorang daripada sepuluh sahabat yang dijamin masuk syurga, dan juga termasuk dalam kalangan ahli syura (majlis perundingan) yang mana Rasulullah SAW wafat dalam keadaan redha terhadap mereka semua.

Beliau memeluk Islam pada usia muda pada ketika itu umurnya baru 17 tahun. Dalam hadis sahih diriwayatkan bahawa beliau berkata: *“Tiada seorang pun memeluk Islam pada hari aku masuk Islam, dan aku telah melalui tujuh hari dalam keadaan ketika itu aku adalah sepertiga daripada orang Islam.”*

Beliau adalah orang yang membangunkan Kota Kufah serta mengusir orang-orang orang-orang Parai daripadanya. Saad terkenal sebagai seorang yang mustajab doa. Beliau berhijrah dan turut menyertai Perang Badar serta semua peperangan selepas itu. Beliau juga adalah orang pertama yang memanah (melepaskan anak panah) di jalan Allah dalam peperangan. Seorang pahlawan berkuda yang berani dan merupakan antara panglima Rasulullah SAW.

Pada zaman Khalifah Abu Bakar beliau sangat dihormati dan dimuliakan. Begitu juga pada zaman Umar al-Khattab, beliau diberikan kedudukan tinggi dan dilantik sebagai gabenor di Kufah. Beliau juga yang membuka Kota Al-Mada'in di Iraq.

Beliau adalah pemimpin yang disegani dan ditaati. Saidina Umar kemudian menggugurkan beliau daripada jawatan gabenor Kufah – bukan kerana lemah atau khianat tetapi kerana suatu maslahat yang dilihat oleh Umar pada waktu itu. Tetapi Saidina Umar tetap melantik beliau dalam enam ahli syura yang diberi hak memilih khalifah selepas Umar.

Antara ayat Al-Quran yang turun mengenai beliau

وَإِنْ جَاهِدَاكَ لِتُشْرِكَ بِي مَا لَيْسَ لَكَ بِهِ عِلْمٌ

“Dan sekiranya mereka (ibu bapa) berusaha bersungguh-sungguh memaksamu untuk kamu mempersekutukan Aku dengan sesuatu yang kamu tidak mempunyai pengetahuan tentangnya...”

Ini kerana ketika Saad memeluk Islam, ibunya enggan makan dan minum selama beberapa hari kerana ingin memaksanya kembali kepada agama asal. Maka Saad berkata kepada ibunya:



تَعْلَمِينَ وَاللَّهِ لَوْ كَانَتْ لَكَ مِائَةُ نَفْسٍ فَخَرَجْتُ نَفْسًا نَفْسًا مَا تَرَكْتُ دِينِي هَذَا لِشَيْءٍ، إِنْ شِئْتَ فَكُلِّي وَإِنْ شِئْتَ فَلَا تَأْكُلِي.

“Wahai ibu, ketahuilah! Demi Allah, kalau ibu mempunyai seratus nyawa lalu keluar satu demi satu, aku tidak akan meninggalkan agama ini (Islam) walau apa pun. Kalau ibu mahu makan, makanlah. Jika tidak mahu, maka terserah.”

Maka turunlah ayat tersebut sebagai pengiktirafan terhadap keteguhan imannya.

Antara kemuliaan Saidina Saad Bin Abi Waqqas

وعن ابنِ عُمَرَ، قَالَ: كُنَّا جُلُوسًا عِنْدَ رَسُولِ اللَّهِ ﷺ، فَقَالَ: يَدْخُلُ عَلَيْكُمْ مِنْ هَذَا الْبَابِ رَجُلٌ مِنْ أَهْلِ الْجَنَّةِ، قَالَ: فليسَ مِنَّا أَحَدٌ إِلَّا وَهُوَ يَتَمَنَّى أَنْ يَكُونَ مِنْ أَهْلِ بَيْتِهِ، فَإِذَا سَعَدُ بْنُ أَبِي وَقَّاصٍ قَدْ طَلَعَ.

Daripada Ibn Umar r.a berkata:

“Kami sedang duduk bersama Rasulullah SAW, lalu Baginda bersabda: ‘Akan masuk daripada pintu ini seorang lelaki dari ahli syurga.’ Maka masing-masing berharap kalau-kalau orang itu adalah ahli keluarganya.”

Tiba-tiba Saad bin Abi Waqqas yang masuk.



Saidina Bilal Bin Rabah

Beliau adalah seorang lelaki yang beradal dari Habsyi (Ethiopia), beliau menjadi muazin Nabi SAW, beliau juga adalah hamba yang telah dibebaskan oleh Abu Bakar. Ada yang memanggilnya Bilal bin Hamamah iaitu nama ibunya. Beliau antara yang awal memeluk Islam, juga antara sahabat yang disiksa kerana beriman kepada Allah. Beliau tetap sabar dan tabah menghadapi ujian tersebut. Disebabkan ketabahan dan kentalnya iman saidina Bilal, saidina Abu Bakar telah membeli dan membebaskannya.

Beliau menyertai Perang Badar dan semua peperangan lain selepasnya. Dulu Umayyah bin Khalaf bekas tuannya telah menyeksanya di Mekah untuk memaksanya murtad, tetapi beliau tetap teguh atas Islam. Ketika Perang Badar, Saidina Bilal ternampak Umayyah yang telah ditangkap oleh Abdur Rahman bin Auf. Lalu Bilal berkata: "Inilah ketua kufur, Umayyah bin Khalaf! Aku tidak akan selamat jika dia terselamat!" Maka beliau bersama beberapa orang Ansar menyeranginya sehingga mereka membunuh Umayyah.

Saidina Umar pernah berkata: "Abu Bakar adalah pemimpin kami, dan dia telah membebaskan pemimpin kami (Bilal)." – diriwayatkan oleh al-Bukhari.

Setelah azan disyariatkan di Madinah, Saidina Bilal adalah orang yang melaungkan azan di hadapan Rasulullah ﷺ, bergilir-gilir dengan Ibn Ummi Maktum. Kadang-kadang Saidina Bilal, kadang-kadang Saidina Ibn Ummi Maktum.

Bilal terkenal dengan suara yang merdu dan lantang. Dakwaan bahawa huruf "س" ^② Bilal diterima khusus di sisi Allah adalah tidak berasas. Beliau juga melaungkan azan pada hari Pembukaan Kota Mekah di atas Kaabah.

Selepas kewafatan Rasulullah ﷺ, beliau meninggalkan tugas azan dan berangkat ke Syam sebagai mujahid. Ketika Umar datang ke al-Jabiyah di Syam, Bilal melaungkan azan di hadapannya selepas khutbah Zuhur, lalu semua orang menangis teresak-esak kerana rindu pada zaman Nabi ﷺ.

② Apa maksud huruf "س" Bilal?

Ada riwayat tidak sahih dan cerita-cerita orang awam yang mengatakan:

- Bila Bilal azan dan menyebut syahadah, dia menyebut huruf "س" (sin) dalam "أشهد" dengan sebutan yang tidak tepat, misalnya sebut "أشدد" tanpa huruf 'س'.
 - Lalu orang kata bunyi "سين بلال" (sebutan Bilal yang tidak sempurna) **tetap diterima Allah dan lebih afdal.**
 - Ada yang tambah cerita bahawa Allah suka bunyi itu, atau itu lebih mulia daripada sebutan orang lain.
- Namun semua riwayat ini tiada sandaran yang jelas.



أَنَّ رَسُولَ اللَّهِ ﷺ، قَالَ لِبِلَالٍ: إِنِّي دَخَلْتُ الْجَنَّةَ، فَسَمِعْتُ خَشْفَ نَعْلَيْكَ أَمَامِي، فَأَخْبِرْنِي بِأَرْجَى عَمَلٍ عَمِلْتَهُ.
فَقَالَ: مَا تَوَضَّأْتُ إِلَّا صَلَّيْتُ رَكْعَتَيْنِ. فَقَالَ: بِذَاكَ

Dalam hadis sahih, Rasulullah ﷺ pernah bersabda kepada Bilal:

“Wahai Bilal, aku telah masuk syurga dan aku terdengar hantaran tapak kakimu di hadapanku. Beritahulah kepadaku amalan yang paling kau harapkan (yang menyebabkan itu).” Bilal menjawab: “Aku tidak pernah berwuduk melainkan aku solat dua rakaat selepasnya.” Maka baginda bersabda: “Kerana itulah (engkau mendapat kelebihan itu).”

Saidina Bilal adalah lelaki yang berkulit hitam gelap, tinggi, kurus, berbulu lebat, dan nipis di bahagian jambang pipinya. Beliau meninggal dunia di Damsyik ketika berlakunya wabak Ta'un 'Amwas pada tahun 18 Hijrah.



Saidina Abdullah Bin Mas'ud

Beliau memeluk Islam pada peringkat awal sebelum Umar. Antara sebab yang mendorong beliau memeluk Islam ialah ketika Rasulullah SAW bersama Abu Bakar bertemu dengan beliau (Ibn Mas'ud) yang ketika itu sedang menggembala kambing. Mereka meminta susu, lalu beliau berkata: "Aku hanyalah seorang yang diamanahkan oleh itu aku tidak boleh memberi kepada sesiapa pun tanpa izin tuannya."

Maka Rasulullah SAW pun mengambil seekor kambing yang belum pernah dikahwini oleh jantan, lalu Nabi mengikatnya dan memerah susu, lalu Baginda meminumnya dan diberikan juga kepada Abu Bakar. Kemudian Baginda menyapu susu itu ke dada kambing lalu bersabda kepada teteknya: "Kecutlah kembali," lalu kambing itu pun kembali seperti biasa. Aku (Ibn Mas'ud) lalu berkata: "Ajarkan aku doa ini sebagai balasannya." Baginda bersabda: "*Sesungguhnya engkau adalah pemuda yang akan diajarkan...(oleh Allah)*" ③

Ibn Mas'ud adalah orang yang pertama yang membaca al-Quran secara kuat (jahar) di Mekah selepas Nabi SAW, yang ketika itu beliau di hadapan Kaabah dan musyrikin Quraisy sedang berkumpul. Ketika beliau membaca Surah ar-Rahman, bangunlah kaum musyrikin menerpanya dan memukulnya.

Beliau adalah sahabat yang setia bersama Rasulullah SAW selepas memeluk Islam. Beliau senantiasa melakukan khidmat kepada baginda Rasul dengan menjadi pembawa bantal dan siwak Nabi SAW. Beliau antara yang berhijrah ke Habsyah, kemudian kembali ke Mekah, lalu berhijrah ke Madinah. Beliau turut menyertai Perang Badar, dan beliaulah yang membunuh Abu Jahal setelah dua anak Afra' menjatuhkannya terlebih dahulu. Beliau turut hadir dalam semua peperangan lain.

③ روي أحمد عن عبد الله بن مسعود قال: كنت أُرعى غنماً لعقبة بن أبي معيط، فمرَّ بي رسول الله ﷺ وأبو بكر، فقالا: يا غلام، هل عندك من لبن؟ قلتُ: نعم، ولكنِّي مُؤْتَمَنٌ. قال: فهل عندك من شاة لم يُنزَ عليها الفحل؟ قلتُ: نعم، فأتيتُهما بها، فمسح رسول الله ﷺ صرغها، وسمى الله، فحلبت في إناء، فشرب، وسقى أبا بكر، ثم قال لصرعها: اقْلُصْ، فقلص، فقلتُ: غُلْمَنِي مِنْ هَذَا الْقَوْلِ يَا رَسُولَ اللَّهِ، قال: إِنَّكَ غُلَامٌ مُعَلَّمٌ

Daripada Abdullah bin Mas'ud r.a berkata:

Pada suatu ketika aku sedang menggembala kambing milik 'Uqbah bin Abi Mu'ayt. Lalu Rasulullah ﷺ dan Abu Bakar melalui tempatku. Mereka berkata: "Wahai pemuda! Adakah engkau mempunyai susu?" Aku menjawab: "Ya, ada, tetapi aku hanya seorang yang diberi amanah (tidak boleh memberinya tanpa izin tuanku). Lalu Nabi bertanya: "Adakah kamu punya kambing yang belum dikahwini oleh jantan?" Aku menjawab: "Ya ada." Maka aku membawanya. Lalu Rasulullah ﷺ menyapu tetek kambing itu dan menyebut nama Allah, lalu Baginda memerah susu ke dalam bekas. Baginda minum dan Baginda memberikan minum kepada Abu Bakar. Kemudian Baginda berkata kepada tetek kambing itu, "Kecutlah semula," lalu ia pun kembali seperti asalnya. Maka aku berkata kepada Baginda: "Ajarkanlah aku ucapan (doa) ini, wahai Rasulullah." Maka Baginda bersabda: "Sesungguhnya engkau adalah seorang pemuda yang akan diajarkan (oleh Allah)."



Abdullah Bin Mas'ud antara sahabat yang mempunyai suara merdu ketika membaca Al-Quran. Rasulullah SAW pernah berkata kepadanya suatu hari:

"Bacakan al-Quran untukku." Ibn Mas'ud berkata: "Adakah aku mahu membacakan kepada engkau sedangkan al-Quran itu diturunkan kepada engkau?" Baginda bersabda: "Sesungguhnya aku suka mendengar bacaan al-Quran itu daripada selain diriku..."

Dalam hadis yang lain diriwayatkan bahawa Ibn Mas'ud memanjat sebatang pokok untuk mengambil buah, lalu para sahabat terkejut melihat betisnya yang kecil, lalu Nabi bersabda: *"Demi Tuhan yang jiwaku berada di tangan-Nya, kedua betis itu di sisi Allah lebih berat di atas neraca timbangan daripada Gunung Uhud."*

Kemudian beliau berpindah ke Madinah dan jatuh sakit di sana, lalu Saidina Uthman bin Affan datang menziarahinya. Diceritakan bahawa Saidina Uthman bertanya kepadanya: "Apa yang kamu adukan?" Beliau menjawab: "Dosa-dosaku." Saidina Uthman bertanya: "Apakah yang kamu inginkan?" Beliau menjawab: "Rahmat Tuhanku." Saidina Uthman berkata: "Mahukah aku panggilkan doktor untukmu? Beliau menjawab: "Dialah (Allah) yang membuatku sakit." Saidina Uthman bertanya lagi: "Mahukah aku berikan kamu harta?" sedangkan beliau meninggalkan dua orang anak perempuan, namun beliau menjawab: *"Aku tidak berhajat kepada harta itu."*

Beliau dikebumikan di Baqi' ketika usia 60 tahun.



Saidina

Suhaib ar-Rumi

Beliau dikenali dengan gelaran Abū Yahyā, beliau berasal dari Yaman. Kaum Rom pernah menyerang negeri mereka lalu menawannya ketika beliau masih kecil. Beliau tinggal bersama kaum Rom beberapa ketika, kemudian Bani Kalb^④ membelinya dan membawanya ke Mekah. Di Mekah, beliau dibeli pula oleh Abdullah bin Jud'an, lalu Abdullah membebaskannya. Beliau tinggal di Mekah selama suatu tempoh yang lama.

Apabila Rasulullah SAW diutus, Saidina Suhaib beriman kepadanya dan memeluk Islam. Beliau adalah antara orang yang terawal memeluk Islam. Beliau dan 'Ammar bin Yasir menerima Islam pada hari yang sama iaitu selepas lebih kurang tiga puluh lebih orang memeluk Islam terlebih dahulu. Beliau termasuk dalam golongan yang lemah dan disiksa kerana Allah SWT.

Ketika Rasulullah SAW berhijrah, Saidina Suhaib turut berhijrah beberapa hari selepas baginda berhijrah. Orang kafir Quraisy telah mengejanya dan cuba menghalangnya daripada berhijrah. Apabila Suhaib menyedari kafir Quraisy mengejanya, beliau meletakkan anak-anak panahnya di busur seraya berdoa:

“Demi Allah, kamu semua tahu bahawa aku adalah antara pemanah paling handal. Demi Allah kamu tidak akan dapat mendekatiku melainkan aku akan bunuh setiap seorang kamu dengan setiap satu anak panah ini, kemudian aku akan menentang kamu dengan pedangku sehingga aku mati. Tetapi jika kamu sebenarnya mahukan harta, maka aku akan tunjukkan di mana hartaku disimpan iaitu tertanam di tempat sekian-sekian.”

Lalu mereka berpatah balik dan mengambil hartanya. Tatkala beliau sampai di Madinah, Rasulullah SAW bersabda kepadanya:

“Untung engkau berniaga wahai Abu Yahya!”

Kemudian turunlah firman Allah:

وَمِنَ النَّاسِ مَن يَشْرِى نَفْسَهُ ابْتِغَاءَ مَرْضَاتِ اللَّهِ وَاللَّهُ رَءُوفٌ بِالْعِبَادِ

Maksudnya: “Dan ada antara manusia yang menjual dirinya untuk mencari keredaan Allah dan Allah Maha Penyantun terhadap hamba-hamba-Nya”

^④Kabilah Arab yang tinggal di kawasan Syam, mereka terkenal sebagai kabilah yang bersahabat baik dengan Romawi (Byzantine), sebab itu ramai orang mereka terdedah dengan pengaruh Rom.



Beliau menyertai Perang Badar, Uhud, dan semua peperangan selepas itu. Ketika Saidina Umar al-Khattab menubuhkan majlis syura untuk memilih khalifah, Saidina Suhaib adalah orang yang mengimami solat umat Islam sehinggalah Saidina Uthman dipilih sebagai khalifah. Beliau juga yang mengimami solat jenazah ke atas Saidina Umar dan membaca khutbah untuknya. Saidina Suhaib dikenali dengan loghat bukan Arab yang pekat, kerana dia dibesarkan di kalangan bangsa Rom.

Walaupun beliau sangat prihatin dan beragama, beliau juga seorang yang suka bergurau dan ceria. Diriwayatkan bahawa Rasulullah SAW melihatnya makan kurma muda yang segar sedangkan matanya sedang sakit sebelah, lalu Nabi bersabda:

“Kamu makan makanan sejuk sedang matamu sakit?”

Beliau menjawab: *“Aku makan dari bahagian mata yang sihat sahaja.”* Maka Rasulullah SAW tertawa.

Beliau wafat di Madinah pada tahun 38 Hijrah, ada juga riwayat yang mengatakan pada tahun 39H, dalam usia lebih daripada 70 tahun.



Saidina Abu Zar al-Ghifari

Menurut satu pendapat yang masyhur nama sebenar beliau ialah Jundub bin Junadah. Beliau memeluk Islam pada awal perkembangan dakwah di Mekah. Beliau termasuk orang keempat atau kelima yang memeluk Islam. Beliau juga merupakan orang pertama yang memberi salam Nabi dengan lafaz salam menurut syariat Islam.

Beliau berkata: "Aku adalah satu perempat daripada Islam. Sebelumku hanya tiga orang yang memeluk Islam, lalu akulah yang keempat."

Beliau datang kepada Rasulullah ﷺ dan berkata:

"Assalamu 'alaika ya Rasulullah, aku bersaksi bahawa tiada tuhan selain Allah dan bahawa Muhammad adalah Rasul Allah."

Beliau melihat kegembiraan terpancar pada wajah baginda ﷺ. Lalu Nabi bersabda kepadanya:

"Kembalilah kepada kaum kamu dan beritahulah kepada mereka, sehingga sampai perintahku (selanjutnya)."

Tetapi beliau berkata:

"Demi Tuhan yang mengutusmu dengan kebenaran, aku akan tetap menjeritkan (syahadah) ini di tengah-tengah mereka!"

Maka beliau keluar menuju ke Masjidil Haram dan melaungkan dengan suara paling tinggi:

"Aku bersaksi bahawa tiada tuhan melainkan Allah dan bahawa Muhammad adalah Rasul Allah!"

Maka orang Quraisy bangun memukul beliau sehingga beliau jatuh tersungkur. Saidina Abbas bapa saudara Nabi datang lalu melindunginya dan berkata:

"Celakalah kamu! Tidakkah kamu tahu bahawa dia dari kabilah Ghifar, sedangkan kabilah itu berada di jalan perdagangan kamu menuju Syam?"

Maka musyrikin Quraisy melepaskannya. Keesokan harinya, beliau mengulang lagi laungan itu lalu mereka memukul beliau sekali lagi dan saidina Abbas datang melindunginya.



Kemudian beliau kembali kepada kaumnya kabilah Ghifar yang berada di sekitar padang pasir kawasan Waddan^⑤ untuk menetap dan berdakwah di sana. Setelah Rasulullah ﷺ berhijrah ke Madinah, beliau turut berhijrah ke Madinah iaitu selepas berlakunya peperangan Khandaq. Di Madinah beliau sentiasa bersama Rasulullah ﷺ sama ada dalam permusafiran atau ketika bermukim. Beliau antara perawi yang meriwayatkan banyak hadis dan juga terdapat banyak hadis menerangkan tentang keutamaan beliau.

Selepas wafatnya Rasulullah ﷺ dan Saidina Abu Bakar, Abu Zar keluar berkelana menuju ke Syam. Kemudian ketika pemerintahan Khalifah Saidina Uthman, khalifah telah memanggilnya supaya kembali ke Madinah. Namun selepas itu beliau keluar menetap di suatu tempat bernama al-Rabdzah dan tinggal di sana sehingga wafat.

Pada waktu wafatnya, beliau hanya ditemani oleh isteri dan beberapa orang anaknya. Sedang mereka kebingungan tidak mampu menguruskan jenazah, tiba-tiba Saidina Abdullah bin Mas'ud datang dari Iraq bersama beberapa sahabat, lalu mereka sempat menghadiri kematiannya dan beliau berpesan bagaimana hendak mengurus jenazahnya. Ada riwayat lain menyatakan bahawa mereka tiba selepas beliau wafat lalu mereka yang memandikan dan mengkafankan serta mengubumikannya.

Sebelum meninggal, beliau memberi pesan kepada keluarganya supaya memasak seekor kambing daripada kambing milik beliau agar mereka boleh makan setelah pemergiannya. Khalifah Uthman kemudian telah menghantar utusan kepada keluarganya dan membantu mereka dengan diberikan tempat tinggal.

^⑤Waddan terletak di laluan perdagangan Makkah-Syam, dan kabilah Ghifar terkenal dalam sejarah sebagai suku yang suka menyamun (sebelum Islam).



Saidina Abdur Rahman bin Auf

Beliau merupakan sahabat yang memeluk Islam pada peringkat awal melalui tangan Abu Bakar. Beliau juga antara sahabat yang berhijrah ke Habsyah dan kemudian berhijrah ke Madinah. Beliau juga menyertai peperangan Badar dan semua peperangan selepas daripada itu.

Rasulullah SAW telah melantiknya untuk pergi memerangi Bani Kalb, dan Baginda menjulurkan hujung serban (adzabah) di antara kedua bahunya sebagai tanda bahawa beliau adalah amir ketua pasukan pada ketika itu.

Beliau merupakan salah seorang daripada sepuluh sahabat yang dijamin syurga, juga merupakan salah seorang daripada 8 orang terawal memeluk Islam, dan termasuk dalam 6 orang ahli syura. Kemudian daripada enam itu, perkara syura tersebut akhirnya kembali kepada 3 orang, dan beliau menjadi orang yang berusaha bersungguh-sungguh untuk melantik Saidina Uthman bin Affan sebagai khalifah.

Pernah berlaku pertelingkahan antara beliau dengan Saidina Khalid bin al-Walid⁶ dalam beberapa peperangan, lalu Saidina Khalid berkata sesuatu yang kasar terhadap beliau. Apabila hal itu sampai kepada Rasulullah ﷺ, Baginda bersabda: *"Adakah kalian mencela para sahabatku? Demi Tuhan yang jiwaku berada di tangan-Nya, sekiranya salah seorang daripada kalian membelanjakan emas sebesar Gunung Uhud sekalipun, tidak akan menyamai (pahala) satu mud (cupak) atau setengah mud yang mereka berikan."*

Abdur Rahman bin Auf telah bersedekah pada zaman Nabi SAW dengan setengah daripada hartanya, iaitu sebanyak 4,000 (dinar atau dirham), kemudian beliau bersedekah lagi 40,000 dirham, kemudian bersedekah lagi 40,000 dinar. Kemudian beliau membiayai jihad dengan 500 ekor kuda di jalan Allah, dan kemudian 500 ekor unta pula. Sebahagian besar harta beliau diperoleh melalui perniagaan.

⁶ Mereka berdua bertengkar kerana Saidina Khalid merasakan sahabat awal memeluk Islam seperti Abdur Rahman terlalu membanggakan kelebihan masuk Islam lebih awal.



Ketika hampir wafat, beliau berwasiat agar setiap seorang daripada sahabat yang masih hidup dan pernah ikut perang Badar diberikan 400 dinar, dan mereka pada waktu itu ahlu Badar berjumlah lebih 100 orang, lalu mereka semua mengambilnya, termasuk Saidina Uthman dan Saidina Ali. Beliau juga mewasiatkan pemberian yang besar kepada setiap seorang daripada para isteri Nabi (Ummahatul Mukminin), sehingga Aisyah berkata:

"Semoga Allah memberinya minum dari air al-Salsabil (di syurga)".

Apabila beliau meninggal dunia, solat jenazah disempurnakan oleh Saidina Uthman bin Affan, dan jenazahnya dipikul di atas bahu sahabat beliau antaranya Saidina Saad bin Abi Waqqas. Beliau dikebumikan di Baqi' pada usia 75 tahun.



Saidina

Abu Hurairah



Abu Hurairah al-Dausi pendapat yang paling masyhur menyatakan bahawa namanya ialah 'Abdul Rahman bin Sakhr. Dalam hadis sahih diriwayatkan bahawa Rasulullah SAW pernah memanggilnya dengan panggilan: “Abā Hir”, dan juga “Yā Abā Hurairah”. Abu Hurairah telah meriwayatkan banyak hadis daripada Rasulullah dan beliau merupakan antara sahabat yang paling banyak menghafal hadis.

Beliau mula mengikuti Rasulullah SAW selepas Perang Khaibar, dan sejak itu beliau tidak pernah berpisah dengan baginda sama ada dalam permusafiran mahupun ketika baginda bermukim. Beliau adalah orang yang paling bersungguh-sungguh mendengar hadis baginda dan memahami ilmunya. Abu Hurairah tetap setia bersama Nabi sekalipun dengan hanya sekadar mendapat makanan yang mengenyangkan perutnya sahaja.

Abu Hurairah pernah berkata pada dirinya, tatkala suatu hari dia mengelap hingusnya dengan baju yang dibuat dari kain yang mewah “Wah, hebat! Abu Hurairah sampai menyapu hingus pada kain mahal? Dahulu aku pernah pengsan kerana terlalu lapar. Ada orang yang berhadapan denganku berkata, ‘Dia ni gila’, padahal aku tidak gila tetapi keadaanku lemah sebab kelaparan. Demi Tuhan yang tiada tuhan selain Dia, aku pernah menekan perutku ke tanah kerana lapar, dan aku mengikat batu di perutku kerana kelaparan. Kadangkala aku meminta seseorang membacakan al-Quran, sedangkan aku lebih tahu bacaan itu daripadanya, tujuannya hanya supaya dia mengajakku ke rumahnya dan memberiku sedikit makanan.”^⑦

⑦ Maksudnya : Abu Hurairah sangat lapar sehingga dia minta orang bacakan ayat al-Quran, sedangkan dia dah hafal ayat itu hanya berharap orang itu mengajaknya pulang ke rumah untuk diberi makan, bukan kerana dia tidak tahu ayat itu. Dengan erti kata yang lain; Macam seseorang yang sangat lapar, lalu dia pergi ziarah ustaz atau kawan, pura-pura tanya soalan agama, padahal dia dah tahu jawapan — tujuannya supaya kawan itu pun pelawa makan tengah hari. Dia bukan menipu isi ilmu, cuma menahan maruah kerana tak mahu minta makanan secara direct.



Kisah yang lain diceritakan oleh Saidina Abu Hurairah katanya: “Ibu aku dahulu seorang wanita musyrik. Aku sentiasa mengajaknya kepada Islam tetapi dia tetap enggan. Suatu hari aku mengajaknya sekali lagi tetapi dia telah menyebutkan kata-kata tentang Rasulullah SAW yang amat aku benci mendengar kata-kata tersebut. Aku pun pergi kepada Rasulullah dalam keadaan menangis dan berkata:

‘Wahai Rasulullah, sesungguhnya aku telah mengajak ibuku kepada Islam tetapi dia enggan. Hari ini aku mengajaknya lagi dan dia telah mengucapkan tentang dirimu suatu perkataan yang aku sangat benci untuk dengar. Maka doakanlah kepada Allah agar memberi hidayah kepada ibuku.’

Lantas Baginda bersabda:

‘Ya Allah! Berilah hidayah kepada ibu Abu Hurairah.’

Maka aku segera pulang untuk memberi khabar gembira kepadanya dengan doa Rasulullah SAW. Apabila aku sampai ke rumah, aku dapati pintu tertutup. Aku mendengar bunyi air dan bunyi geseran langkah. Ibuku berkata: ‘Wahai Abu Hurairah, tunggulah di tempatmu.’ Kemudian dia membuka pintu dan memakai bajunya dan tergesa-gesa dia mengenakan tudungnya, lalu berkata:

‘Aku bersaksi bahawa tiada Tuhan selain Allah dan bahawa Muhammad adalah hamba dan Rasul-Nya.’

Maka aku kembali kepada Rasulullah SAW sambil menangis kerana gembira sebagaimana sebelumnya aku menangis kerana sedih. Lalu aku berkata:

‘Wahai Rasulullah, bergembiralah! Allah telah memperkenankan doamu. Allah telah memberi hidayah kepada ibu Abu Hurairah.’

Kemudian aku berkata lagi:

‘Wahai Rasulullah, doakanlah pula agar Allah menjadikan aku dan ibuku yang dikasihi oleh hamba-hambaNya yang beriman.’

Maka Baginda bersabda:

‘Ya Allah! Jadikanlah hamba-Mu ini (Abu Hurairah) dan ibunya dikasihi oleh hamba-hamba-Mu yang beriman dan jadikanlah mereka berdua mengasihi orang-orang yang beriman.’

Kata Abu Hurairah: “Maka tidaklah Allah menciptakan seorang mukmin yang apabila mendengar tentang diriku atau melihatku, atau ibuku melainkan dia akan mencintaiku.”



Saidina Khalid bin al-Walid

Beliau digelar “Saifullah al-Maslul” (Pedang Allah yang terhunus), seorang pahlawan yang sangat terkenal dengan keberaniannya. Tidak pernah ditewaskan sama ada pada zaman jahiliah atau dalam Islam.

Beliau memeluk Islam pada hari pertama bulan Safar tahun ke-8 Hijrah. Beliau menyertai Perang Mu’tah, dan kepimpinan tentera akhirnya jatuh kepada beliau secara tidak langsung walaupun beliau tidak dilantik secara rasmi. Pada hari itu beliau bertempur dengan amat berani, sehingga telah patah sembilan bilah pedang di tangannya, dan yang tinggal hanyalah sebilah pedang Yaman yang digunakan sampai akhir.

Nabi SAW bersabda tentang peperangan Mu’tah:

“Panji tentera diambil oleh Zaid lalu dia gugur, kemudian diambil oleh Ja’far lalu dia gugur, kemudian diambil oleh Abdullah bin Rawahah lalu dia gugur, kemudian panji itu diambil oleh sebilah pedang daripada pedang-pedang Allah, maka Allah memberi kemenangan melalui tangannya.”

Diriwayatkan bahawa ketika Perang Yarmuk, kopiah (serban kecil) Khalid jatuh semasa bertempur. Beliau berhenti dan tetap mencari kopiah itu, lalu ada yang menegur beliau kerana mencari kopiah tersebut.

Khalid menjawab:

“Di dalamnya ada beberapa helai rambut daripada ubun-ubun Rasulullah SAW. Tidak pernah aku membawanya ke medan perang melainkan aku diberikan kemenangan.”

Saidina Abu Bakar pernah berkata ketika melantik Khalid memimpin perang Riddah:

“Aku pernah mendengar Rasulullah SAW bersabda: ‘Sebaik-baik hamba Allah ialah Khalid bin al-Walid dia adalah pedang daripada pedang-pedang Allah, Allah hunuskan dia ke atas orang kafir dan munafik.’”

Semasa Khalid hampir wafat, beliau menangis lalu berkata:

“Aku telah menyertai sekian banyak peperangan. Tidak ada satu inci pun di tubuhku melainkan ada kesan luka pedang, tikaman tombak atau panahan anak panah. Namun, sekarang aku mati di atas katilku, kematian biasa seperti seekor unta mati. Maka janganlah tidur lena mata orang-orang pengecut!”^⑧

^⑧ beliau kecewa kerana walaupun begitu berani, dia tidak dapat syahid. Dan dalam masa yang sama dia mengejek orang pengecut yang tidak pergi perang tetapi tidur nyenyak.



Saidina Abdullah bin Abbas

Beliau ialah Abdullah bin Abbas bin Abdul Muttalib, sepupu Rasulullah ﷺ. Gelaran beliau ialah “جَبْرُ هَذِهِ الْأُمَّةِ” (ulama besar umat ini) dan Turjuman al-Qur’an (penterjemah dan penafsir al-Quran). Beliau digelar al-Habr (lautan ilmu) dan al-Bahr (samudera ilmu) kerana luasnya pengetahuan agama.

Beliau banyak meriwayatkan hadis daripada Rasulullah SAW serta mengambil ilmu daripada ramai sahabat. Ramai sahabat dan tabi’in pula mengambil ilmu daripadanya. Beliau memiliki pandangan tafsir dan pendapat khusus yang tidak dimiliki sahabat lain kerana keluasan ilmunya, ketajaman pemikirannya, kesempurnaan akalinya dan kemuliaan keturunannya. Beliau juga merupakan ayah kepada para khalifah Bani Abbas.

Ibnu Abbas berkata:

“Ketika aku lahir, aku dibawa kepada Rasulullah SAW dalam keadaan masih berbalut kain lampin, lalu baginda mentahnik aku dengan air liurnya.”

Ibnu Abbas juga berkata:

“Rasulullah SAW wafat ketika aku berumur 15 tahun dan aku sudah berkhatan.”

Beliau berhijrah bersama ayahnya sebelum pembukaan Mekah. Ibnu Abbas sempat menyaksikan Pembukaan Mekah, Perang Hunain, Perang Taif pada tahun ke-8 Hijrah, dan haji Wada’ pada tahun ke-10, dan sejak itu beliau sentiasa bersama Nabi SAW.

Beliau sentiasa mengikuti Nabi kemana baginda pergi. Beliau menghafal setiap ucapan, perbuatan dan segala keadaan Baginda dengan tepat. Beliau mengambil ilmu besar daripada para sahabat juga, dengan pemikiran yang tajam, kefasihan lidah, kecantikan, dan kepetahan bicara serta kemuliaan keturunan.



Doa Nabi ﷺ untuk Saidina Ibnu Abbas

Rasulullah ﷺ mendoakan beliau agar diberikan kefahaman dalam agama dan diberi ilmu tafsir al-Quran (ta'wil).

Antaranya hadis:

Dari Ibn Umar: Sesungguhnya Umar (Al-Khattab) selalu memanggil Abdullah bin Abbas ke sisinya, lalu berkata: Sesungguhnya aku pernah melihat Rasulullah ﷺ mendoakanmu pada suatu hari, lalu baginda menyapukan tangannya ke atas kepalamu dan meludah sedikit ke dalam mulutmu sambil bersabda: “Ya Allah! Fahamkanlah dia dalam agama dan ajarkanlah dia tafsir al-Quran (ta'wil).”

Dalam hadis lain, Ibn Abbas berkata:

"Suatu hari Rasulullah SAW masuk ke tandas lalu aku sediakan air wuduk untuknya. Bila baginda keluar, Baginda bertanya: Siapa yang menyiapkan air ini? Mereka berkata: Ibnu Abbas. Maka baginda bersabda: ‘Ya Allah, fahamkanlah dia dalam agama dan ajarkanlah dia tafsir al-Quran.’”



Saidina Ukasyah bin Mihshan

Beliau adalah salah seorang sahabat terkemuka. Beliau merupakan sekutu Bani Abd Syams dan digelar Abu Mihshan. Beliau tergolong dalam kalangan bangsawan sahabat yang utama dan berakhlak mulia.

Beliau telah berhijrah, menyertai Perang Badar dan menunjukkan keberanian yang hebat pada hari itu. Ketika itu pedangnya patah, lalu Rasulullah SAW memberinya sebatang pelepah tamar (عُرْجُون) – lalu pelepah itu bertukar menjadi pedang di tangannya yang lebih tajam daripada besi. Pedang itu kemudian dikenali dengan nama al-‘Aun.

Beliau turut menyertai Perang Uhud, Khandaq dan peperangan selepasnya.

Pada suatu ketika, Rasulullah SAW menyebut tentang 70,000 orang yang masuk syurga tanpa hisab, lalu ‘Ukasyah berdiri dan berkata:

“Wahai Rasulullah, doakanlah kepada Allah supaya aku termasuk dalam kalangan mereka.”

Maka Rasulullah SAW bersabda:

“Ya Allah, jadikanlah dia daripada kalangan mereka.”

Kemudian seorang lelaki lain bangun dan berkata:

“Wahai Rasulullah, doakanlah supaya aku juga termasuk dalam kalangan mereka.”

Baginda menjawab: *“Ukasyah telah mendahuluimu dengan permintaan itu.”*

(Ucapan ini masyhur dan sering dijadikan perumpamaan: "سبقك بها عكاشة" – bermaksud: ‘Ukasyah dah potong awak dahulu.’)

Selepas kewafatan Nabi SAW, ‘Ukasyah turut keluar bersama Khalid bin al-Walid semasa pemerintahan Abu Bakar dalam perang menentang Musailamah al-Kazzab. Ketika di kawasan Dhī al-Qissah, beliau dihantar bersama Thabit bin Aqram sebagai pasukan perisik. Mereka terserempak dengan Talhah al-Asadi dan saudaranya Salamah lalu keduanya terbunuh di tangan musuh tersebut. Sebelum itu, ‘Ukasyah sempat membunuh seorang panglima musuh bernama Habbal bin Talhah. Talhah al-Asadi akhirnya memeluk Islam selepas itu.

Usia ‘Ukasyah ketika gugur syahid adalah 44 tahun, dan beliau dikatakan antara lelaki yang paling tampan pada zamannya.



Saidina *‘Umar bin ‘Abd al-‘Azīz*

‘Umar bin ‘Abd al-‘Azīz merupakan seorang tābi‘īn agung. Imam Ahmad bin Hanbal pernah berkata:

"Aku tidak menganggap perkataan mana-mana tabi‘īn sebagai hujah, kecuali perkataan ‘Umar bin ‘Abd al-‘Azīz."

Beliau dibai‘ah menjadi khalifah selepas kewafatan sepupunya, Sulaiman bin ‘Abd al-Malik, kerana Sulaiman telah mewasiatkan jawatan itu kepadanya sebelum meninggal dunia.

Sifat Zuhud dan Tawaduk Beliau

Ketika pulang dari jenazah Sulaiman, telah dibawakan kepada ‘Umar kenderaan-kenderaan rasmi khalifah untuk dinaiki. Namun beliau enggan, lalu berkata:

"Mā shā’ Allāh, lā ḥawla wa lā quwwata illā billāh. Bawakan kepadaku baghalku (kenderaan tunggangan sederhana)."

Kemudian beliau memerintahkan supaya kenderaan-kenderaan mewah khalifah yang berupa kuda-kuda pilihan itu dijual secara lelong, dan hasil jualannya dimasukkan ke dalam Baitul Māl.

Keadilan dan Kepedulian Sosial

Walaupun tempoh pemerintahannya singkat sekitar 2 tahun setengah, beliau berusaha keras menegakkan keadilan. Antaranya mengembalikan hak-hak yang dizalimi kepada pemiliknya, menyampaikan hak kepada setiap yang berhak. Serta setiap hari, pegawai kerajaan akan menyeru: *"Di mana orang yang berhutang?", "Di mana orang yang ingin bernikah?", "Di mana orang miskin?", "Di mana anak-anak yatim?"*. Sehingga semua golongan ini dicukupkan keperluan mereka oleh baitul mal.

Kesedaran Amanah

Isterinya, Fāṭimah, pernah menceritakan suatu kisah iaitu ketika beliau masuk menemui suaminya yang sedang duduk di tempat solatnya, meletakkan pipi di atas tangan sambil menangis deras. Fāṭimah bertanya:

"Mengapa engkau menangis, wahai Amir al-Mu‘minīn?"



Beliau menjawab:

"Celakalah aku, wahai Fāṭimah. Aku telah dipertanggungjawabkan atas urusan umat ini. Aku terfikir tentang orang miskin yang lapar, orang sakit yang tidak terurus, orang yang tidak berpakaian, orang yang teraniaya, orang yang tidak berdaya, dan mereka semua di seluruh penjuru negeri. Aku tahu bahawa Allah akan menyoalku tentang mereka pada hari kiamat, sedangkan penentangku nanti adalah Rasulullah ﷺ. Aku takut ketika itu aku tidak punya hujah untuk membela diri, lalu aku kasihan pada diriku sendiri... maka aku menangis."

Saat Kewafatan

Ketika hampir wafat, beliau berkata: *"Dudukkan aku."*

Lalu mereka mendudukkannya, dan beliau berkata:

"Ya Allah, Engkaulah yang memerintahkanku, namun aku banyak kurang. Engkaulah yang melarangku, namun aku banyak melanggar (diulang 3 kali). Tetapi, Lā ilāha illā Allāh."

Kemudian beliau mengangkat kepala dan memandang tajam ke hadapan. Ahlinya berkata: *"Wahai Amirul Mukminin, engkau memandang dengan pandangan yang sangat tajam."* Beliau berkata kepada keluarganya: *"Keluirlah kalian dariku."*

Maka mereka keluar, lalu mereka mendengar beliau berkata: *"Selamat datang, wahai wajah-wajah yang bukan wajah manusia dan bukan wajah jin."*

Kemudian beliau membaca ayat:

تِلْكَ الدَّارُ الْآخِرَةُ نَجْعُهَا لِلَّذِينَ لَا يُرِيدُونَ عُلُوًّا فِي الْأَرْضِ وَلَا فَسَادًا وَالْعَاقِبَةُ لِلْمُتَّقِينَ

Itulah negeri akhirat yang Kami jadikan untuk orang-orang yang tidak menginginkan ketinggian di muka bumi dan tidak pula berbuat kerosakan; dan kesudahan yang baik itu bagi orang-orang yang bertakwa.[Al-Qaṣaṣ: 83]

Selepas itu mereka mendengar suara terakhir beliau. Apabila masuk semula, mereka mendapati beliau telah menghembuskan nafas terakhir, dengan wajah dihadapkan ke arah kiblat.



al-Imam Abu Hanifah

Nama Dan Kedudukan

Beliau ialah al-Imam Abu Hanifah, nama sebenarnya al-Nu'man bin Thabit al-Taymi. Seorang faqih besar dari Iraq, tokoh agung dalam Islam, salah seorang daripada empat imam mazhab yang diikuti umat Islam, dan merupakan yang paling awal wafat antara mereka.

Hubungan Dengan Sahabat

Beliau sempat hidup pada zaman sahabat Nabi ﷺ dan pernah melihat Saidina Anas bin Malik رضي الله عنه.

Kedudukan Dari Sudut Kejujuran

Berkata Yahya bin Ma'in:

"Abu Hanifah adalah seorang yang thiqah (dipercayai), seorang yang benar, tidak pernah dituduh berdusta."

Beliau pernah dipaksa oleh Ibnu Hubairah (gabenor) untuk menjadi qadhi (hakim), tetapi beliau menolak sehingga dipukul kerana enggan menerima jawatan itu.

Pandangan Ulama Tentang Keilmuannya

Yahya bin Sa'id lebih memilih fatwa Abu Hanifah, bahkan katanya: *"Demi Allah, kami tidak pernah dengar pendapat yang lebih baik daripada pandangan Abu Hanifah. Kami mengambil kebanyakan pendapatnya."*

Abdullah bin al-Mubarak berkata: *"Kalau bukan kerana Allah menolong aku dengan Abu Hanifah dan Sufyan al-Thauri, nescaya aku akan menjadi seperti orang kebanyakan."*

Imam al-Syafi'i berkata: *"Sesiapa yang ingin mendalami fiqh, maka dia adalah anak-anak (bergantung) kepada Abu Hanifah."*

Sufyan al-Thauri dan Ibn al-Mubarak sama-sama berkata: *"Abu Hanifah adalah orang yang paling faqih di bumi pada zamannya."*

Abu Nu'aim berkata: *"Beliau sangat mendalam dalam membahaskan masalah-masalah fiqh."*

Makki bin Ibrahim berkata: *"Beliau adalah orang yang paling alim di muka bumi."*



Amalan Ibadahnya

Menurut riwayat al-Khatib al-Baghdadi, Asad bin 'Amr berkata bahawa Abu Hanifah, seorang yang sentiasa solat malam dengan membaca al-Qur'an setiap malam sambil menangis sehingga jirannya turut merasa kasihan. Selama 40 tahun, beliau solat Subuh dengan wuduk Isyak (bermaksud beliau sentiasa berjaga malam beribadah). Beliau juga mengkhataamkan al-Qur'an 70 kali di tempat beliau wafat.

Kelahiran Dan Kewafatan

Dilahirkan beliau pada tahun 80 Hijrah. Kemudian Wafat pada bulan Rejab tahun 150 Hijrah pada usia 70 tahun. Jenazahnya disolatkan sebanyak enam kali di Baghdad kerana terlalu ramai orang hadir. Makamnya terletak di Baghdad, dan hingga kini masih diziarahi.



al-Ahmad Bin Hambal

Beliau dilahirkan di Baghdad. Ayahnya wafat ketika beliau masih kecil. Pada usia mudanya, beliau gemar menghadiri majlis-majlis ilmu. Beliau seorang yang zuhud dan wara'.

Ketika beliau menuntut ilmu di Yaman, bekalannya telah habis. Gurunya, 'Abd al-Razzaq, menawarkan segenggam penuh dinar kepadanya, tetapi beliau menjawab: *"Kami sudah cukup,"* lalu tidak menerimanya.

Pernah juga pakaian beliau dicuri ketika beliau berada di Yaman, namun beliau hanya duduk di rumah dan menutup pintu. Ketika sahabat-sahabatnya mencarinya, mereka datang menemuinya dan bertanya tentang keadaannya. Beliau memberitahu keadaannya yang baru di uji dengan kehilangan harta benda, lalu mereka menawarkan emas, tetapi beliau tidak menerimanya. Namun beliau hanya mengambil satu dinar sahaja untuk membeli alat tulis bagi tujuan mengambil upah menulis untuk mereka, lalu beliau menulis dengan upah itu.

Pernah juga khalifah al-Ma'mun mengiriskan emas untuk dibahagikan kepada ahli hadis, dan semua orang menerimanya kecuali Ahmad bin Hanbal, beliau enggan mengambilnya emas tersebut.

Beliau juga sabar menanggung kezaliman pada zaman pemerintahan al-Ma'mun, kemudian al-Mu'tasim, dan kemudian al-Wathiq, disebabkan oleh fitnah berkaitan al-Qur'an al-'Azim. Beliau dihukum penjara yang terlalu lama, dihukum dengan sebatan yang terlalu keras, ancaman bunuh, azab yang sangat pedih dan seksaan berat, namun beliau tetap tidak peduli dengan semua itu. Beliau tetap sabar, berpegang teguh dengan agama yang lurus dan jalan yang benar.^⑨

^⑨Isu pada masa itu ialah fitnah "al-Qur'an makhluk" Imam Ahmad Bin Hambal dipaksakan oleh khalifah berfahaman Mu'tazilah, untuk menyatakan al-Quran adalah makhluk, lalu beliau menjadi tokoh utama mempertahankan akidah bahawa al-Qur'an ialah Kalam Allah yang qadim, bukan baharu. Dengan ketegasan ini beliau dipanggil ke istana, ditangkap, dipenjar, diikat dan dipukul dengan sebatan yang sangat keras.



Imam al-Bukhari berkata: *“Ketika Ahmad bin Hanbal dipukul, kami berada di Basrah. Aku mendengar Abu al-Walid al-Tayalisi berkata: Sekiranya Ahmad bin Hambal ini berada di kalangan Bani Isra’il, nescaya beliau akan menjadi kisah sebutan (yang masyhur).”*

Guru Ahmad, Yahya bin Sa’id al-Qattan, berkata: *“Tidak pernah hadir ke Baghdad seseorang yang lebih aku sukai daripada Ahmad bin Hanbal.”*

Sebaik-baik peristiwa pada akhir hayatnya ialah ketika beliau hampir wafat. Beliau memberi isyarat kepada keluarganya supaya berwuduk. Mereka pun mewudukkannya, lalu beliau memberi isyarat supaya diratakan air dicelah-celahkan jarinya. Beliau tetap berzikir kepada Allah ‘Azza wa Jalla sepanjang tika berwuduq itu. Setelah mereka selesai mewudukannya, beliau pun wafat.



An-Najasyi

Apabila Rasulullah ﷺ melihat apa yang menimpa para sahabat daripada pelbagai ujian seksaan Quraisy, sedangkan Baginda berada dalam keadaan aman, kerana penjagaan Allah ‘Azza wa Jalla, serta jaminan bapa saudara Baginda Abu Talib. Dalam masa yang sama Baginda tidak mampu untuk menghalang mereka yakni para sahabat daripada ujian yang menimpa mereka.

Oleh kerana keadaan tersebut Baginda bersabda kepada mereka:

“Jika kamu keluar berhijrah menuju ke bumi Habsyah? Sesungguhnya di sana ada seorang raja yang tidak dizalimi sesiapa pun di sisi pemerintahannya. Dan ia adalah bumi yang benar. Hingga Allah menjadikan untuk kamu jalan keluar daripada apa yang kamu hadapi sekarang.”

Maka berhijrahlah ketika itu orang-orang Islam dari kalangan sahabat Rasulullah ﷺ ke bumi Habsyah kerana menyelamatkan diri penindasan dan berusaha menjaga iman kepada Allah dan agama.

Tatkala Berita itu sampai kepada Quraisy, lalu mereka mengutus ‘Amru bin al-‘As dan ‘Amarah bin al-Walid. Mereka kumpulkan hadiah untuk diberikan kepada an-Najasyi. Maka mereka berdua pun datang membawa hadiah tersebut, lalu an-Najasyi menerimanya, dan mereka berdua membari penghormatan kepadanya.

Kemudian berkata ‘Amru bin al-‘As:

“Sesungguhnya ada beberapa orang dari negeri kami yang lari daripada agama kami, sedang mereka berada di bumi tuanku.”

An-Najasyi bertanya: *“Di negeriku?”*

Mereka berdua menjawab: *“Ya!”*

Maka an-Najasyi pun mengutus utusan kepada kami. Lalu berkata Ja‘far:

“Jangan ada seorang pun daripada kamu bercakap. Aku akan menjadi juru bicara kamu pada hari ini.”

Maka kami pun pergi menghadap an-Najasyi, ketika itu beliau sedang duduk di tempat duduknya, sementara ‘Amru bin al-‘As berada di sebelah kanannya dan ‘Amarah di sebelah kirinya, dan para paderi duduk dalam dua barisan.

Telah berkata ‘Amru dan ‘Amarah kepada an-Najasyi:

“Sesungguhnya mereka Muslimin tidak sujud kepadamu.”



Apabila kami sampai, maka segeralah para paderi dan rahib berkata kepada kami:
“Sujudlah kepada raja.”

Maka Ja'far berkata: “Kami tidak sujud kepada sesuatu melainkan kepada Allah.”
Lalu bertanya an-Najasyi: “Mengapa begitu?”

Ja'far menjawab:

“Sesungguhnya Allah telah mengutus kepada kami seorang Rasul – dialah Rasul yang telah dihabarkan oleh 'Isa bin Maryam عليه السلام bahawa ia akan datang selepasnya, namanya Ahmad. Maka Rasul itu memerintahkan kami supaya menyembah Allah dan tidak menyekutukan-Nya dengan sesuatu, mendirikan solat, menunaikan zakat, menyuruh kami kepada kebaikan, dan melarang kami daripada kemungkaran.”

Maka kagumlah an-Najasyi dengan kata-kata Ja'far itu.

Apabila 'Amru bin al-'As melihat keadaan itu, dia berkata:

“Semoga Allah bantu tuanku, sesungguhnya mereka ini menyalahi tuanku berhubung nabi 'Isa bin Maryam.”

Maka bertanya an-Najasyi kepada Ja'far:

“Apa yang dikatakan oleh sahabat kamu mengenai Ibnu Maryam itu?”

Ja'far menjawab:

“Dia berkata mengenainya sebagaimana firman Allah:

Bahawa dia adalah hamba Allah, kalimah-Nya, yang dikeluarkan daripada perawan suci (Maryam) yang tidak pernah disentuh lelaki dan tidak pernah melahirkan sebelumnya.”

Lalu an-Najasyi mengambil sebatang kayu kecil dari tanah, kemudian mengangkatnya dan berkata:

“Wahai sekalian paderi dan rahib, tidaklah mereka (Muslimin) menambah lebih daripada apa yang kita katakan tentang Ibnu Maryam ini walau sebesar batang kayu ini.”



Kemudian dia berkata:

“Selamat datang kepada kamu semua dan kepada orang yang kamu datang daripadanya (yakni Rasulullah ﷺ). Sesungguhnya aku bersaksi bahawa dia adalah Rasulullah, dan dialah yang dihabarkan oleh nabi ‘Isa. Kalaulah tidak kerana aku berada dalam urusan kerajaan ini, nescaya aku akan pergi kepadanya sehingga aku mencium kedua sandalnya. Tinggallah kamu di negeriku selama mana kamu mahu.”

Lalu an-Najasyi memerintahkan untuk kami diberikan makanan dan pakaian, serta berkata wakil musyrikin Quraisy:

“Pulangkan kembali hadiah kedua orang ini (‘Amru dan ‘Amarah).”

Dan apabila an-Najasyi meninggal dunia, Rasulullah ﷺ bersabda:

“Hari ini telah wafat seorang lelaki yang soleh. Maka bangunlah kamu semua, solatlah ke atas saudara kamu Ashamah (أصحة).”



Tiga Orang Yang Terperangkap Di Dalam Gua

Rasulullah ﷺ bersabda:

“Sesungguhnya ada tiga orang dari umat sebelum kamu yang sedang berjalan, tiba-tiba hujan turun, lalu mereka berteduh masuk ke dalam sebuah gua. Maka batu besar jatuh menutup pintu gua sehingga mereka terperangkap.

Maka sebahagian mereka berkata kepada yang lain:

‘Demi Allah, wahai sahabat-sahabatku, tiada menyelamatkan kamu semua kecuali kejujuran. Maka hendaklah setiap orang di antara kamu berdoa kepada Allah dengan amalan yang dia yakin paling jujur dia lakukan kerana Allah.’

Doa orang pertama

Seorang daripada mereka berkata:

“Ya Allah, sesungguhnya Engkau tahu bahawa aku pernah mempunyai seorang pekerja. Dia bekerja untukku dengan upah satu farq (ukuran timbunan) beras. Tetapi dia pergi meninggalkan upahnya. Maka aku mengambil beras itu, lalu menanamnya hingga ia berkembang menjadi harta, sehingga aku dapat membeli daripadanya beberapa ekor lembu.

Kemudian pekerja itu datang menuntut upahnya. Maka aku berkata kepadanya:

‘Pergilah kepada lembu-lembu itu, ambillah ia, kerana semua itu asalnya daripada beras yang menjadi upahmu.’

Dia pun berkata kepadaku: *‘Sesungguhnya yang aku tuntutan hanyalah satu farq beras sahaja.’*

Tetapi aku berkata: *‘Ambillah lembu-lembu itu, sesungguhnya ia datang daripadanya.’*

Lalu dia pun membawa semua lembu itu.

Ya Allah, jika Engkau tahu bahawa aku melakukan perkara itu kerana takut kepada-Mu, maka lapangkanlah kesusahan kami ini.”

Maka batu itu bergerak sedikit, terbuka sehingga mereka dapat melihat langit.



Doa orang kedua

Yang lain pula berkata:

“Ya Allah, sesungguhnya Engkau tahu bahawa aku mempunyai dua orang ibu bapa yang sangat tua. Setiap malam aku selalu membawa kepada mereka susu perahan kambingku. Aku tidak pernah memberi minum keluargaku sebelum mereka berdua.

Pada suatu malam aku terlambat pulang, lalu aku dapati mereka berdua sudah tertidur, sedangkan anak-anakku kecil menangis kelaparan di kakiku. Aku tidak suka mengejutkan ibu bapaku, dan aku juga tidak suka memberi minum anak-anakku sebelum mereka berdua.

Maka aku terus menunggu di sisi mereka dengan bekas susu itu di tanganku sehingga terbit fajar.

Ya Allah, jika Engkau tahu bahawa aku melakukan itu kerana takut kepada-Mu, maka lapangkanlah kesusahan kami ini.”

Maka batu itu bergerak lagi, semakin terbuka.

Doa orang ketiga

Yang seorang lagi berkata:

“Ya Allah, sesungguhnya Engkau tahu bahawa aku pernah mempunyai seorang sepupu perempuan yang paling aku cintai antara manusia. Aku ingin berzina dengannya, tetapi dia enggan kecuali jika aku membawa kepadanya seratus dinar.

Maka aku pun berusaha mencari hingga aku berjaya mendapatkannya, lalu aku datang kepadanya dengan wang itu. Aku pun memberikan kepadanya seratus dinar itu, maka dia membenarkan aku mendekatinya.

Namun ketika aku duduk di antara kedua kakinya, dia berkata kepadaku: ‘Bertakwalah kepada Allah, dan janganlah engkau buka cincin (kehormatan) itu kecuali dengan haknya yang sah.’

Maka aku segera bangun meninggalkannya, padahal aku sangat mencintainya, dan aku biarkan wang itu padanya. Ya Allah, jika Engkau tahu bahawa aku melakukan itu kerana takut kepada-Mu, maka lapangkanlah kesusahan kami ini.”

Maka Allah pun melepaskan mereka, batu besar itu tersingkir sepenuhnya, lalu mereka keluar dari gua itu.”



Kisah Dua Orang Raja Yang Bertaubat

Ibn Mas'ud RA berkata:

Ketika ada seorang lelaki dari kalangan umat sebelum kamu, dia berada dalam kerajaannya. Lalu dia berfikir dan mengetahui bahawa semua itu akan dia tinggalkan, dan apa yang dia miliki itu pangkat dan pengaruh telah melalaikannya daripada beribadah kepada Tuhannya.

Maka dia pun menyelinap keluar pada suatu malam melarikan diri dari istananya, dan pada pagi harinya dia sudah berada di dalam kerajaan orang lain. Dia pergi ke tepi pantai, lalu di sana dia membuat batu bata dengan upah, maka dia makan daripadanya kerja dan bersedekah dengan lebih rezekinya.

Dia terus berada dalam keadaan demikian sehingga kedudukan, ibadah, dan kelebihan yang ada padanya diketahui oleh raja negeri itu. Maka raja itu pun mengutus orang untuk memanggilnya datang menghadap. Namun dia enggan datang. Lalu raja itu sendiri menunggang kenderaan dan datang menemuinya.

Ketika si raja pertama melihat raja itu datang, dia pun berpaling dan lari. Maka raja pemilik negeri mengejarnya tetapi tidak dapat menangkapnya. Raja itu pun berseru:

"Wahai hamba Allah, tidak ada bahaya atasmu daripadaku."

Maka dia berhenti sehingga raja itu pun dapat menemuinya. Raja itu bertanya:

"Siapakah engkau? Semoga Allah merahmatimu."

Dia menjawab:

"Aku si fulan bin fulan, pemilik sebuah kerajaan di sebuah negeri. Aku telah berfikir tentang urusanku lalu aku mengetahui bahawa semua itu akan ku tinggalkan, dan sesungguhnya ia telah melalaikanku daripada beribadah kepada Tuhanku 'Azza wa Jalla. Maka aku tinggalkannya dan datang ke sini untuk beribadah kepada Tuhanku."



Lalu raja itu berkata kepadanya:

“Engkau sebenarnya tidak lebih memerlukan apa yang engkau lakukan itu berbanding diriku.”^⑩

Maka raja itu pun turun dari tunggangannya, melepaskannya begitu sahaja, lalu mengikuti lelaki itu. Maka keduanya pun bersama-sama beribadah kepada Allah ‘Azza wa Jalla.

Kemudian mereka berdoa kepada Allah agar dimatikan mereka berdua sekaligus. Maka keduanya pun sampai ajal bersama.

Abdullah (Ibn Mas‘ud RA) berkata:

“Seandainya aku berada di tanah Mesir,^⑪ nescaya aku akan tunjukkan kepada kamu kubur mereka berdua sesuai dengan sifat yang telah Rasulullah SAW sifatkan kepada kami.”

^⑩Raja yang datang menemuinya mengakui bahawa dirinya sendiri lebih memerlukan untuk meninggalkan kerajaan dan beribadah kepada Allah berbanding lelaki itu. Dengan kata lain, bukan hanya lelaki pertama sahaja yang patut lari dari dunia untuk beribadah, bahkan dirinya (raja) juga sangat berhajat kepada perkara yang sama.

^⑪Berkata Syeikh Ahmad Syakir: Ia adalah sebuah medan di bawah Qal‘ah al-Jabal (Kubu Gunung), dahulu merupakan medan milik Ahmad bin Tulun, di situ juga terdapat istana-istana dan kebun-kebunnya. Tempat itu kini dikenali dengan nama Medan Salahuddin, dan juga dengan nama al-Manshiyyah di Kaherah.



Kisah Juraij Seorang Lelaki Bani Israel

Daripada Abu Hurairah RA, daripada Nabi ﷺ, baginda bersabda:

“Adalah Juraij seorang lelaki yang kuat beribadah di dalam satu tempat ibadahnya. Lalu datanglah ibunya kepadanya, lalu berkata: ‘Wahai Juraij, aku ini ibumu datang, maka bercakaplah denganku.’

Apabila Abu Hurairah RA meriwayatkannya, beliau menggambarkan dengan tangannya bagaimana Rasulullah ﷺ meletakkan tangan Baginda pada kening kanannya, seolah-olah menggambarkan Juraij ketika itu sedang khusyuk beribadat.

Ibunya datang ketika dia sedang solat, lalu dia berkata: ‘Wahai Tuhanku, ibuku datang ketika aku sedang solat, maka aku memilih solatku.’ Maka ibunya pun pulang meninggalkan Juraij tanpa sahutanya.

Kemudian ibunya datang lagi kepadanya dan mendapatinya sedang solat, lalu berkata: ‘Wahai Juraij, aku ini ibumu, maka bercakaplah denganku.’ Tetapi Juraij tetap berkata: ‘Ya Allah, ibuku atau solatku? Aku memilih solatku.’ Lalu dia teruskan solatnya.

Ibunya berkata dengan penuh kecewa dan doa: ‘Ya Allah, sesungguhnya ini Juraij, adalah anakku, aku telah memanggilnya tetapi dia enggan menyahut panggilan.. Ya Allah, janganlah Engkau matikan dia sehingga Engkau turunkan kepadanya ujian melalui para wanita pelacur.’

Nabi ﷺ bersabda: Sekiranya ibunya berdoa supaya dia terfitnah dalam agamanya, nescaya dia akan benar-benar terfitnah.

Kemudian ada seorang pengembala kambing yang biasa berteduh di sekitar tempat ibadah Juraij. Maka disana pada ketika itu datanglah seorang wanita, lalu dia pengembala itu berzina dengan wanita tersebut, sehingga wanita itu mengandung dan melahirkan seorang anak.



Lalu orang ramai bertanya kepadanya: ‘Anak ini daripada siapa (siapakah bapa kepada bayi ini)?’ Wanita itu menjawab: ‘Dia daripada pemilik tempat ibadah ini (yakni Juraij).’

Maka orang ramai pun datang beramai-ramai dengan membawa kapak dan cangkul mereka menuju ke tempat ibadah Juraij. Mereka memanggil Juraij untuk keluar, tetapi dia tidak menjawab panggilan mereka. Lalu mereka pun menghancurkan tempat ibadah tersebut.

Maka Juraij pun turun menemui mereka. Mereka berkata: ‘Tanyalah wanita ini (tentang perkara yang telah berlaku itu).’ Maka mereka melihat Juraij hanya tersenyum. Kemudian dia mengusap kepala bayi itu, lalu berkata: ‘Wahai bayi, siapakah ayahmu?’

Bayi itu pun berkata: ‘Ayahku adalah si penggembala kambing.’^⑫

Maka orang ramai pun berkata: ‘Wahai Juraij, apakah engkau mahu kami bina semula tempat ibadatmu dengan emas dan perak?’

Maka dia menjawab: ‘Tidak, tetapi kembalikanlah ia sebagaimana asalnya.’ Maka mereka pun mengembalikannya seperti keadaan asalnya.”

^⑫ Tiga orang yang telah bercakap ketika masih dalam buaian:

1. ‘Isā ibn Maryam عليه السلام.
2. Anak wanita pelacur hasil hubungan dengan penggembala kambing.
3. Anak seorang wanita yang sedang disusukan – ketika itu wanita tersebut melihat seorang lelaki tampan dan berkata: ‘Ya Allah, jadikanlah anakku seperti ini.’ Namun bayi itu (dengan izin Allah) berkata: ‘Ya Allah, jangan jadikan aku seperti ini.’ Kemudian wanita itu melihat seorang wanita yang sedang dituduh (dizalimi) dengan perkara yang dia tidak melakukannya, sedang dia hanya berkata: ‘Cukuplah Allah bagiku, dan Dialah sebaik-baik Pelindung.’ Maka si ibu berkata: ‘Ya Allah, janganlah Engkau jadikan anakku seperti wanita itu.’ Namun bayi itu berkata: ‘Ya Allah, jadikanlah aku seperti wanita itu.’



Kisah Lelaki Pemilik Seribu Dinar

Rasulullah ﷺ bersabda:

Seorang lelaki dari Bani Israel telah meminta pinjaman daripada seorang lelaki Bani Israel yang lain sebanyak seribu dinar. Lelaki yang memberi pinjam berkata:

“Bawakan kepadaku saksi untuk aku persaksikan.”

Peminjam menjawab: “Cukuplah Allah sebagai saksi.”

Lalu dia berkata lagi:

“Bawakan kepadaku penjamin.”

Peminjam menjawab: “Cukuplah Allah sebagai penjamin.”

Dia pun berkata: “Engkau benar.”

Maka diberinya pinjaman itu dengan tempoh yang ditetapkan.

Kemudian si peminjam keluar mengembara di lautan, lalu dia menyelesaikan urusannya. Setelah sampai tempoh yang dijanjikan, dia mencari kapal untuk pulang bagi melunaskan hutang, tetapi tidak menjumpai sebarang kapal.

Maka dia mengambil sebatang kayu, kemudian melubanginya dan memasukkan ke dalamnya seribu dinar dan sepucuk surat ditulis kepada si pemberi pinjam. Kemudian ditutup lubang itu, lalu dia membawa kayu tersebut ke tepi laut, seraya berdoa:

“Ya Allah, sesungguhnya Engkau Maha Mengetahui bahawa aku telah berhutang dengan si fulan sebanyak seribu dinar. Dia telah meminta penjamin daripadaku, lalu aku katakan: Cukuplah Allah sebagai penjamin, dan dia redha dengan-Mu. Dia juga telah meminta saksi daripadaku, lalu aku katakan: Cukuplah Allah sebagai saksi, dan dia redha dengan-Mu. Kini aku telah berusaha bersungguh-sungguh mencari kapal untuk menghantar semula amanah itu kepadanya, namun aku tidak menemuinya. Maka aku titipkan wang ini kepada-Mu, ya Allah.”

Lalu dia melemparkan kayu itu ke laut sehingga ia hanyut. Setelah itu, dia masih terus berusaha mencari kapal lain untuk pulang ke negerinya.



Sementara itu, lelaki yang memberi pinjam keluar menanti di tepi laut kalau-kalau ada kapal datang membawa balik wangnya. Tiba-tiba dia ternampak sebatang kayu yang hanyut. Dia mengambilnya untuk dijadikan kayu api di rumah. Ketika dibelah kayu itu, dia mendapati seribu dinar dan sepucuk surat di dalamnya.

Beberapa waktu kemudian, peminjam pun sampai dengan sebuah kapal. Dia datang kepada lelaki itu lalu membawa seribu dinar seraya berkata:

“Demi Allah, aku tidak berhenti berusaha mencari kapal untuk membawa pulang wangmu, namun aku tidak menemui kapal lain kecuali kapal yang aku naiki ini.”

Lelaki pemberi pinjam bertanya:

“Adakah engkau telah menghantarkan sesuatu kepadaku sebelum ini?”

Peminjam menjawab:

“Bukankah aku sudah memberitahumu bahawa aku tidak menemukan kapal sebelum kapal yang aku naiki ini?”

Maka lelaki pemberi pinjam berkata:

“Sesungguhnya Allah telah menyampaikan kepadamu apa yang engkau hantarkan di dalam kayu itu. Maka ambillah wangmu ini yang engkau bawa, dan pulanglah dengan hati yang tenang.”



Kisah Qadhi & Zulqarnain

Zulqarnain adalah seorang raja yang sangat adil. Beliau sering menyiasat sendiri urusan pemerintahannya dan tidak bergantung bulat-bulat pada laporan pegawai. Jika beliau mendapati ada pengkhianatan, beliau sendiri menegurnya, dan tidak menerima sesuatu melainkan setelah menyelidik dengan mata kepala sendiri.

Suatu hari, beliau keluar menyamar di sebuah bandar. Beberapa hari beliau duduk berdekatan dengan seorang qadhi (hakim), tetapi peliknya, selama beberapa hari itu tidak ada orang datang membawa kes atau pertikaian kepadanya.

Ketika Zulqarnain berasa hampir ingin pulang, tiba-tiba datang dua orang lelaki bersengketa.

Lelaki pertama mengadu:

“Wahai qadhi, aku membeli sebuah rumah daripada lelaki ini. Aku membanggunya, lalu aku menemui sebuah harta (harta karun) di dalamnya. Aku memanggilnya untuk mengambil harta itu, tetapi dia menolak.”

Maka hakim bertanya kepada lelaki kedua: “Apa katamu?”

Dia menjawab:

“Demi Allah, aku tidak menanam harta itu dan aku tidak tahu tentangnya. Ia bukan milikku, dan aku tidak mahu menerimanya daripadanya.”

Lalu lelaki pertama berkata:

“Wahai qadhi, perintahkan seseorang mengambil harta ini dan engkau letakkannya di mana sahaja engkau suka.”

Namun qadhi menjawab:

“Engkau mahu lari daripada masalah, tetapi mahu aku pula yang masuk ke dalam masalah itu? Engkau tidak berlaku adil kepadaku. Aku rasa ini bukan cara pengadilan yang dikehendaki raja.”

Kemudian qadhi berkata:

“Mahukah kamu berdua aku cadangkan sesuatu yang lebih adil daripada apa yang kamu minta daripadaku?”

Keduanya menjawab: “Ya.”



Maka qadhi bertanya kepada lelaki pertama:

“Adakah engkau mempunyai anak lelaki?”

Dia menjawab: “Ya.”

Kemudian qadhi bertanya kepada lelaki kedua:

“Adakah engkau mempunyai anak perempuan?”

Dia menjawab: “Ya.”

Qadhi berkata:

“Kalau begitu, kahwinkan anak perempuanmu dengan anak lelaki ini. Gunakan harta yang ditemui itu sebagai mas kahwin dan belanja perkahwinan mereka. Kemudian selebihnya serahkan kepada pasangan itu sebagai modal untuk hidup. Maka dengan itu, kamu berdua mendapat bahagian kebaikan dan keburukan harta tersebut secara adil.”

Reaksi Zulqarnain

Apabila Zulqarnain mendengar keputusan itu, dia merasa amat kagum lalu berkata kepada qadhi:

“Aku tidak menyangka ada manusia di bumi ini yang akan berbuat sepertimu, atau seorang hakim yang mampu memberi keputusan seperti ini.”

Qadhi yang tidak mengenali Zulqarnain menjawab:

“Bukankah memang sepatutnya setiap orang berbuat seperti ini?”

Zulqarnain pun berkata:

“Tidak, tidak semua berbuat begini.”

Maka qadhi bertanya dengan penuh kehairanan:

“Kalau begitu, adakah negeri mereka diturunkan hujan?”

Zulqarnain sangat kagum dengan jawapan itu lalu berkata:

“Benar, dengan keadilan seperti inilah langit dan bumi tetap teguh terpelihara.”^⑬

⑬ Maksudnya: kalau benar ada manusia yang tidak berlaku adil, bagaimana mungkin rezeki mereka masih turun? Sebab qadhi ini memahami bahawa keadilan adalah syarat turunnya rahmat Allah, termasuk hujan. Ini selari dengan firman Allah:

وَلَوْ أَنَّ أَهْلَ الْقُرَىٰ آمَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ

(Surah al-A'raf: 96)

“Sekiranya penduduk negeri-negeri itu beriman dan bertaqwa, pasti Kami bukakan kepada mereka keberkatan dari langit dan bumi.”



Saidatina Khadijah Binti Khuwailid

Beliau adalah orang pertama yang beriman kepada Allah dan Rasul-Nya serta membenarkan apa yang dibawa oleh Baginda. Maka Allah meringankan beban dakwah ke atas Rasulullah ﷺ dengannya. Setiap kali Baginda mendengar sesuatu yang menyakitkan daripada penentangan manusia lalu pulang kepadanya, beliau akan meneguhkan hati Baginda dan memudahkan Baginda menghadapi urusan manusia.

Ketika Rasulullah ﷺ pulang dari gua Hira' dalam keadaan hatinya bergetar ketakutan saat turunnya wahyu pertama. Lalu Baginda masuk menemui Saidatina Khadijah. Baginda berkata: "Selimuti aku, selimuti aku!" Maka beliau pun menyelimutinya sehingga hilang rasa takut tersebut.

Kemudian Baginda berkata kepada Saidatina Khadijah serta menceritakan kepadanya peristiwa turunnya wahyu dan bersabda: "Sesungguhnya aku bimbang terhadap diriku."

Maka Saidatina Khadijah berkata: "Tidak sama sekali, demi Allah! Allah tidak akan sekali-kali menghinakanmu. Sesungguhnya engkau menyambung silaturrahim, memuliakan tetamu, menanggung orang yang lemah, memberi kepada orang yang tidak punyai apa-apa, dan membantu dalam urusan kebenaran."

Kemudian Khadijah membawa Rasulullah ﷺ berjumpa dengan Waraqah bin Naufal. Lalu Waraqah memberi khabar gembira kepadanya tentang kenabian.

Rasulullah ﷺ bersabda: "Sebaik-baik wanita pada zamannya ialah Maryam binti 'Imran, dan sebaik-baik wanita pada zamannya ialah Khadijah binti Khuwailid." Maksudnya: sebaik-baik wanita pada zaman masing-masing.

'Aisyah r.a berkata: "Aku tidak pernah cemburu terhadap isteri-isteri Nabi ﷺ seperti cemburuku terhadap Saidatina Khadijah. Padahal aku tidak pernah melihatnya. Akan tetapi Baginda sering menyebut-nyebut namanya. Kadang-kadang Baginda menyembelih kambing lalu memotong-motongnya dan mengirimkan bahagian-bahagiannya kepada sahabat-sahabat Saidatina Khadijah. Maka aku pun berkata: 'Seolah-olah tiada wanita lain di dunia ini melainkan Khadijah!' Maka Nabi ﷺ bersabda: 'Sesungguhnya dia dahulu begini dan begitu, dan aku dikurniakan anak daripadanya.'"



Daripada Abu Hurairah r.a, katanya: “Jibril datang menemui Rasulullah ﷺ lalu berkata: Wahai Rasulullah, ini Saidatina Khadijah telah datang membawa sebuah bekas berisi kuah lauk, atau makanan, atau minuman. Maka apabila dia datang kepadamu, sampaikanlah salam kepadanya daripada Tuhannya dan daripadaku. Dan berilah khabar gembira kepadanya dengan sebuah rumah di syurga yang diperbuat daripada mutiara (atau permata), yang di dalamnya tiada hiruk-pikuk dan tiada kepenatan.”

Saidatina Khadijah wafat di Mekah sebelum Rasulullah ﷺ berhijrah ke Madinah. Semoga Allah meredhainya dan merahmatinya.



Isteri Nabi Ayyub

Nabi Ayyub adalah seorang lelaki yang mempunyai banyak harta daripada pelbagai jenis, dan beliau juga mempunyai anak-anak serta keluarga yang ramai. Namun semua itu telah tiada daripadanya, dan dia diuji pada tubuhnya dengan pelbagai jenis penyakit, sehingga tidak ada lagi anggota tubuh yang sihat kecuali hati dan lidahnya sahaja. Dengan keduanya beliau terus mengingati Allah عز وجل.

Penyakitnya berlarutan begitu lama sehingga teman duduk menjauhinya, dan sahabat karib pun lari daripadanya. Beliau diusir dari negerinya, dan tidak ada seorang pun yang menaruh belas kasihan kepadanya kecuali isterinya. Dialah yang menjaga hak suaminya, mengingati kebaikan suaminya yang terdahulu terhadap dirinya, serta kasih sayangnya.

Isterinya terus berulang-alik untuk mengurus keperluan suaminya, membantunya dalam menunaikan hajat, dan menguruskan segala keperluannya. Namun keadaannya menjadi semakin lemah, hartanya berkurang, sehingga dia terpaksa bekerja dengan orang lain untuk mendapatkan upah demi memberi makan kepada Nabi Ayyub dan memenuhi keperluannya رضى الله عنها وأرضاها. Dia bersabar bersamanya atas ujian kehilangan harta dan anak, serta musibah khusus baginya iaitu penderitaan suami, kesempitan hidup, bekerja kepada orang lain setelah sebelumnya berada dalam kemewahan, kemuliaan, dan kedudukan.

Dia bekerja untuk orang lain dengan upah dan hasil itu diberinya makan kepada Nabi Ayyub عليه السلام. Tetapi kemudian orang ramai tidak lagi mahu mengambil khidmatnya kerana mereka tahu dia adalah isteri Nabi Ayyub, lalu mereka takut terkena penyakit suaminya, atau ditimpa bala dengan sebab bergaul dengannya.

Maka ketika tidak ada seorang pun yang mahu mengambil khidmatnya, dia pun menjual salah satu daripada dua tocang rambutnya kepada seorang anak perempuan bangsawan dengan harga makanan yang banyak dan baik. Lalu dia membawa makanan itu kepada Ayyub.

Nabi Ayyub bertanya:

“Dari mana engkau dapat makanan ini?” Beliau mengingkari dan tidak mahu makan. Dia (isterinya) berkata: “Aku bekerja kepada orang.”



Keesokan harinya, kerana tidak menemui seorang pun yang mahu mengambil khidmatnya, dia menjual tocang rambut yang satu lagi dengan harga makanan. Lalu dibawanya makanan itu kepada Ayyub. Nabi Ayyub sekali lagi mengingkari dan bersumpah tidak akan memakannya sehingga isterinya memberitahu dari mana dia mendapatkan makanan itu. Maka dia pun membuka tudung kepalanya, lalu Nabi Ayyub melihat kepalanya telah dicukur.

Maka Nabi Ayyub berdoa:

﴿أَتَى مَسْنَى الضُّرِّ وَأَنْتَ أَرْحَمُ الرَّاحِمِينَ﴾

“Sesungguhnya aku telah ditimpa penyakit, dan Engkaulah Yang Maha Penyayang daripada segala yang penyayang.”

Hinggalah pada suatu hari, isterinya agak lambat pulang, lalu Allah mewahyukan kepada Ayyub di tempatnya:

﴿ارْكُضْ بِرِجْلِكَ هَذَا مُغْتَسَلٌ بَارِدٌ وَشَرَابٌ﴾

“Hentakkanlah kakimu; inilah air sejuk untuk mandi dan minum.”

Maka isterinya pun pulang dan mendapati suaminya sudah sembuh daripada penyakitnya, dalam keadaan lebih baik daripada sebelumnya. Apabila dia melihatnya, dia berkata:

“Semoga Allah memberkatimu, adakah engkau melihat Nabi Allah yang sedang diuji itu? Demi Allah, aku tidak pernah melihat seorang lelaki yang lebih mirip dengannya ketika dia sihat melainkan engkau.”

Nabi Ayyub pun menjawab:

“Sesungguhnya akulah dia.”

Lalu Allah menggantikan bagi mereka berdua dengan kebaikan kerana kesabaran mereka, dan menganugerahkan selepas penderitaan serta kepayahan itu dengan kerehatan dan kebahagiaan. Itulah balasan bagi orang-orang yang sabar.



Ummu Sulaim

Beliau adalah ibu kepada Anas bin Malik, khadam Rasulullah ﷺ. Beliau termasuk dalam golongan wanita Ansar yang awal memeluk Islam.

Apabila Abu Talhah datang untuk meminangnya sedangkan ketika itu Abu Talhah masih kafir, beliau mensyaratkan supaya Abu Talhah masuk Islam, dan itulah maharnya, beliau tidak menginginkan selain itu. Maka ia menjadi mahar yang paling berharga, sebagaimana kata Anas: "Itulah mahar yang paling mahal, mahar Ummu Sulaim; maharnya adalah Islam."

Anas berkata lagi: "Ketika Nabi ﷺ tiba di Madinah, Ummu Sulaim datang kepada Rasulullah ﷺ lalu berkata: Wahai Rasulullah, ini Anas (anaknya), dia akan berkhidmat untukmu." Ketika itu Anas berusia 10 tahun, maka beliau pun berkhidmat kepada Nabi ﷺ sehinggalah baginda wafat.

Ummu Sulaim juga keluar menyertai peperangan bersama Rasulullah ﷺ. Pada hari peperangan Uhud, Saidatina Aisyah binti Abu Bakar dan Ummu Sulaim berada dalam keadaan baju mereka tersingsing, berlari membawa bejana yang berada di belakang mereka, lalu menuangkan air ke dalam mulut kaum Muslimin. Kemudian mereka kembali mengisi bekas tersebut dan datang lagi untuk menuangkan air ke mulut para pejuang.

Ketika Perang Hunain, Abu Talhah bertemu dengannya dan mendapati beliau membawa sebilah pisau besa). Abu Talhah bertanya: "Apa ini?" Ummu Sulaim menjawab: "Jika ada seorang musyrik mendekatiku, aku akan tikam perutnya dengan ini." Abu Talhah berkata: "Tidakkah engkau dengar apa yang dikatakan oleh Ummu Sulaim?" Maka Rasulullah ﷺ pun tertawa. Ummu Sulaim berkata: "Wahai Rasulullah, bukankah sepatutnya aku membunuh orang-orang murtad yang kalah di hadapanmu?" Maka baginda ﷺ bersabda: "Sesungguhnya Allah telah mencukupkan pertolongan dan telah berbuat baik, wahai Ummu Sulaim."



Ketika anaknya (dari Abu Talhah) meninggal dunia, Abu Talhah pulang lalu bertanya tentang keadaan anaknya. Ummu Sulaim menjawab: "Dia dalam keadaan paling tenang." Abu Talhah menyangka anaknya sudah sembuh, lalu beliau makan, kemudian Ummu Sulaim berhias untuknya, maka berlakulah persetubuhan antara mereka berdua. Setelah pagi, barulah Ummu Sulaim memberitahunya bahawa anak mereka telah meninggal.

Khabar itu sampai kepada Rasulullah ﷺ, lalu baginda bersabda: "Semoga Allah memberkati malam kamu berdua."

Ketika Rasulullah ﷺ bernikah dengan Safiyyah di Khaibar atau dalam perjalanan, yang menghiasinya, menyisir rambutnya, dan memperelokkan dirinya untuk Rasulullah ﷺ adalah Ummu Sulaim binti Milhan, ibu kepada Anas bin Malik.

Ummu Sulaim pernah berkata: "Aku tidak akan berkahwin sehingga Anas membesar, boleh bercakap dan duduk dalam majlis."

Semoga Allah meredai Ummu Sulaim, memasukkannya ke dalam syurga, dan membalasnya dengan sebaik-baik balasan.

Saidina Anas selalu duduk di majlis lalu berkata:

"Semoga Allah membalas ibuku dengan sebaik-baik balasan. Sungguh, dia telah menjaga dan mendidiku dengan sebaik-baiknya."



Zainab binti Jahsh

Zainab binti Jahsh adalah isteri Rasulullah ﷺ yang pertama sekali meninggal dunia. Ibunya bernama Umaymah binti 'Abd al-Muttalib. Nama asalnya ialah Barrah, lalu Rasulullah ﷺ menamakannya Zainab, dan beliau digelar Umm al-Hakam.

Beliau ialah isteri yang Allah sendiri nikahkan dengan Nabi ﷺ, dan beliau berbangga dengan hal itu berbanding isteri-isteri Baginda yang lain. Beliau berkata:

“Keluarga kalian yang menikahkan kalian, sedangkan aku, Allah yang menikahkan aku dari langit.”

Firman Allah Ta'ala:

﴿ فَلَمَّا قَضَىٰ زَيْدٌ مِنْهَا وَطَرًا زَوَّجْنَاكَهَا ﴾

Maka tatkala Zaid telah mengakhiri hajatnya terhadapnya (menceraikannya), Kami nikahkan engkau dengannya. (al-Ahzab: 37)

Sebelum menikah dengan Nabi ﷺ, beliau adalah isteri Zaid bin Harithah (anak angkat Rasulullah ﷺ). Setelah Zaid menceraikannya, Nabi ﷺ menikahnya. Pada hari Nabi ﷺ masuk ke rumahnya, ayat hijab diturunkan.

Zainab adalah isteri yang sering disamakan dengan Aisyah binti Abu Bakar dalam kecantikan dan kedudukan. Beliau seorang yang taat beragama, wara', ahli ibadah serta banyak bersedekah.

Rasulullah ﷺ pernah bersabda:

“Yang paling cepat di antara kalian menyusulku adalah yang paling panjang tangannya.”

Maksudnya: yang paling banyak sedekah. Zainab juga seorang wanita yang pandai membuat kerja dengan tangannya, dan hasil itu beliau sedekahkan kepada fakir miskin.

Aisyah رضي الله عنها pernah berkata:

“Aku tidak pernah melihat seorang wanita pun yang lebih baik dalam agama, lebih bertaqwa kepada Allah, lebih jujur dalam perkataan, lebih menyambung silaturrahim, lebih amanah, dan lebih banyak sedekah daripada Zainab binti Jahsh.”



Selepas Haji Wada', beliau tidak lagi menunaikan haji, kerana Rasulullah ﷺ pernah bersabda kepada isteri-isterinya:

"Ini (haji) kemudian duduklah di rumah-rumah (kamu)."

Maka Zainab dan Suda berkata:

"Demi Allah, selepas ini kami tidak akan menaiki tunggangan lagi."

Diriwayatkan juga bahawa Saidina Umar pernah mengutuskan kepadanya suatu pemberian sebanyak 12,000 dirham, lalu beliau menyedekahkan semuanya kepada keluarganya. Setelah itu beliau berdoa:

"Ya Allah, janganlah aku sempat menerima pemberian Umar selepas ini."

Tidak lama kemudian beliau wafat pada tahun 20 Hijrah, dan disolatkan oleh Saidina Umar.

Beliaulah wanita pertama yang dibuatkan keranda di kalangan isteri Rasulullah ﷺ, dan beliau dimakamkan di perkuburan al-Baqi'.



Safiyyah Binti ‘ Abdul al-Muttalib

Beliau ialah ibu kepada al-Zubair bin al-‘Awwam, dan saudara perempuan (seibu sebapa) kepada Saidina Hamzah. Ibu mereka ialah Halah binti Wahib bin ‘Abd Manāf bin Zuhrah.

Tidak ada perselisihan tentang keislamannya. Beliau hadir pada hari Perang Uhud, dan sangat berdukacita atas kematian saudaranya, Saidina Hamzah.

Pada hari Perang Khandaq, beliau membunuh seorang lelaki Yahudi yang datang mengelilingi benteng tempat beliau berada, sedangkan benteng itu kosong. Beliau berkata kepada al-Ḥassān:

“Turunlah dan bunuh dia.”

Tetapi al-Ḥassān enggan. Maka beliau pun turun sendiri lalu membunuh lelaki itu.

Kemudian beliau berkata:

“Turunlah dan ambillah senjatanya. Kalau bukan kerana aku seorang wanita, pasti aku sendiri yang mengambilnya.”

Namun al-Ḥassān berkata:

“Aku tidak berhajat kepadanya.”

Beliau adalah wanita pertama yang membunuh seorang lelaki musyrik.

Beliau pernah berkahwin pertama kali dengan al-Ḥārith bin Ḥarb bin Umayyah, kemudian selepas itu dinikahi oleh al-‘Awwām bin Khuwaylid, dan daripadanya beliau melahirkan al-Zubair dan ‘Abd al-Ka‘bah.

Beliau meninggal dunia di Madinah pada tahun 20 Hijrah, ketika berusia 73 tahun, dan dikebumikan di al-Baqi‘.



Ummu Aymman

Barakah binti Tha'labah bin 'Amr bin Ḥuṣayn bin Mālik bin Salamah bin 'Amr bin al-Nu'mān, hamba wanita Rasulullah ﷺ, yang diwarisinya daripada ayahnya, dan ada yang mengatakan daripada ibunya.

Beliau telah memelihara Baginda ketika kecil, begitu juga selepas itu. Beliau pernah meminum air kencing Baginda, lalu Baginda bersabda kepadanya:

“Sesungguhnya engkau telah menjaga dirimu daripada api neraka.”

Baginda ﷺ telah memerdekakannya dan mengahwinkannya dengan 'Ubayd, lalu daripadanya beliau melahirkan anaknya Ayman, maka beliau dikenali dengan panggilan Ummu Aiman.

Kemudian beliau berkahwin dengan Zaid bin Ḥārithah, hamba yang telah dimerdekakan Rasulullah ﷺ, dan daripadanya beliau melahirkan Usāmah bin Zaid.

Beliau berhijrah dua kali, iaitu ke Habsyah dan ke Madinah. Beliau merupakan antara wanita yang solehah. Rasulullah ﷺ sering menziarahinya di rumahnya dan bersabda:

“Dia adalah ibuku setelah ibuku.”

Beliau wafat selepas kewafatan Rasulullah ﷺ dengan jarak lima bulan, dan ada yang mengatakan enam bulan.



Wanita Solehah

Abu Hurairah berkata:

Pada suatu masa dahulu, ada seorang lelaki bersama isterinya hidup dalam keadaan serba kekurangan, tidak memiliki apa-apa. Lelaki itu pulang dari suatu perjalanan dalam keadaan lapar, sangat letih kerana ditimpa kesusahan yang berat.

Lalu dia berkata kepada isterinya:

“Ada sesuatu makanan di sisimu?”

Isterinya menjawab:

“Ya, bergembiralah, sesungguhnya telah datang rezeki Allah kepadamu.”

Namun lelaki itu meminta lagi dengan berkata:

“cubalah engkau cari, jika ada sesuatu (makanan)!”

Isterinya menjawab:

“Ya, sebentar lagi, kita berharap rahmat Allah.”

Apabila penantian itu semakin panjang, lelaki itu berkata lagi:

“bangunlah dan carilah kalau ada sesuatu, bawakan kepadaku kerana aku sudah sampai pada tahap sangat lapar dan lemah.”

Isterinya menjawab:

“Ya, sekarang ini dia atas dapur makanan sedang dimasak, janganlah tergesa-gesa.”

Apabila lelaki itu diam sejenak, si isteri pun berkata dalam hatinya:

“Alangkah baiknya jika aku bangun melihat dapurku.”

Maka dia pun bangun, lalu mendapati dapurnya penuh dengan daging-daging kambing. Dan batu gilingnya sedang berputar dengan sendirinya. Maka dia pun pergi ke batu giling lalu menghentikannya, dan mengeluarkan apa yang ada di dalam dapurnya daripada daging kambing.

Abu Hurairah berkata:

“Demi Tuhan yang jiwa Abu al-Qasim berada dalam genggamannya, Nabi Muhammad ﷺ bersabda:

Jika wanita itu tidak menghentikan batu giling itu, nescaya ia akan terus berputar dan menggiling (tepung) hingga ke hari kiamat.”



Jarir Bin Abdullah

Daripada Jarir bin Abdullah al-Bajali r.a. berkata:

“Aku berbai’ah kepada Rasulullah ﷺ untuk menegakkan solat, menunaikan zakat dan memberi nasihat kepada setiap Muslim.”

Termasuk dalam nasihat untuk sesama Muslim ialah tidak menyembunyikan daripada mereka sesuatu perkara yang kita tahu ada padanya kebaikan dan kejayaan untuk mereka, sama ada di dunia atau di akhirat.

Diriwayatkan daripada Jarir bin Abdullah r.a. bahawa beliau pernah menyuruh hambanya membeli seekor kuda. Hambanya membeli dengan harga 300 dirham dan membawanya bersama tuannya untuk menerima bayaran. Saidina Jarir berkata kepada penjual:

“Ku lihat kudamu lebih berharga daripada 300 dirham, sanggupkah engkau menjualnya dengan harga 400 dirham?”

Penjual berkata: “Terserah kepadamu.”

Jarir berkata lagi:

“Kudamu lebih bernilai daripada itu, sanggupkah engkau menjualnya dengan harga 500 dirham?”

Beliau terus menaikkan harga 100 demi 100, sedangkan si penjual tetap bersetuju, hingga akhirnya harga mencecah 800 dirham dan beliau membelinya dengan harga itu.

Lalu ada yang bertanya kepada Jarir mengenai perbuatannya tersebut, beliau menjawab:

“Sesungguhnya aku telah berbai’ah dengan Rasulullah ﷺ untuk memberi nasihat kepada setiap Muslim.”



Baqī bin Makhlad al-Qurtubī

Dr. Muhammad Fu'ād Sarkīn berkata dalam bukunya Tārīkh al-Turāth al-'Arabī dalam biografi Baqī bin Makhlad:

“Baqī bin Makhlad al-Qurtubī telah melakukan dua kali pengembaraan; ke Mesir, Syam, Hijaz dan Baghdad untuk menuntut ilmu. Perjalanan pertamanya berlangsung selama empat belas tahun, dan perjalanan keduanya selama dua puluh tahun.”

Dan ketahuilah seluruh pengembaraannya itu bermula dari Andalus, dan semuanya dilakukan dengan berjalan kaki, sebagaimana beliau sendiri menegaskan:

“Setiap orang yang aku lakukan perjalanan kepadanya, maka aku pergi dengan berjalan kaki. Dan setiap orang yang aku dengar daripadanya di pelbagai negeri, aku mendatangnya dengan berjalan kaki.”

Kata muridnya, Abu 'Abd al-Malik Aḥmad bin Muḥammad al-Qurtubī:

“Baqī adalah seorang yang tinggi, kuat, tabah dalam berjalan, tidak pernah dilihat menunggang binatang tunggangan sama sekali, seorang yang tawaduk, dan sentiasa hadir dalam solat jenazah.”

Maka semoga Allah membalas jasanya, atas kesabarannya dan kerinduannya terhadap ilmu. Dan semoga Allah memberkati kehidupannya yang dikorbankan demi memperoleh dan mengumpulkannya.

Kalaulah bukan kerana keajaiban ciptaan fizikal yang Allah sediakan, nescaya tidak akan tumbuh segala kesungguhan itu pada daging dan urat.



al-Imam Abu Hatim Muhammad bin Idris al-Razi

Dan berkata al-Hafiz al-Imam Ibn Abi Hatim al-Razi dalam kitabnya Taqdīmat al-Jarḥ wa al-Ta'dīl, dalam biografi ayahnya al-Imam Abu Hatim Muhammad bin Idris al-Razi, yang lahir pada tahun 195H dan wafat pada tahun 277H, ketika menyebutkan tentang perjalanannya menuntut ilmu:

“Aku mendengar ayahku berkata: Awal aku keluar untuk menuntut hadis, aku menetap selama tujuh tahun. Aku menghitung perjalanan yang kulalui dengan berjalan kaki, lebih dari seribu farsakh (5400 KM). Aku terus menghitungnya, sehingga apabila sudah lebih seribu farsakh aku pun berhenti menghitung.

Adapun perjalananku dari Kufah ke Baghdad, maka itu sudah tidak terhitung berapa kali. Dari Mekah ke Madinah pula berkali-kali. Aku pernah keluar dari tepi laut dekat kota Sila – iaitu di Maghrib al-Aqsa (Maghribi) – menuju Mesir dengan berjalan kaki. Dari Mesir ke Ramla, berjalan kaki. Dari Ramla ke Baitul Maqdis, dari Ramla ke ‘Asqalan, dari Ramla ke Tiberias, dari Tiberias ke Damsyik, dari Damsyik ke Hims, dari Hims ke Antakiyah, dari Antakiyah ke Tarsus.

Kemudian aku kembali dari Tarsus ke Hims, kerana masih ada padaku sesuatu daripada hadis Abu al-Yaman, maka aku mendengarnya. Lalu aku keluar dari Hims ke Baisan, dari Baisan ke Raqqaḥ, dari Raqqaḥ aku menaiki perahu menyusuri Sungai Furat menuju Baghdad. Sebelum aku berangkat ke Syam, aku keluar dari Wasit menuju Nil, dan dari Nil menuju Kufah, semua itu dengan berjalan kaki.

Ini semua adalah dalam perjalananku yang pertama, ketika aku berusia dua puluh tahun. Aku mengembara selama tujuh tahun, keluar dari kota Rayy pada tahun 213H, bulan Ramadan, dan kembali pada tahun 221H.

Dan aku keluar kali kedua pada tahun 242H, lalu kembali pada tahun 245H. Aku tinggal selama tiga tahun – ketika itu umurku dalam perjalanan ini 47 tahun.”



